

海  
之  
樓  
詩  
卷



上 冊



2744  
.H74h  
v.1

海峽樓詩

YORK UNIVERSITY

MAY 15 2001


EAST ASIAN STUDIES

太歲在闕逢攝  
提格刊於武昌





鄭海藏孝胥先生遺像



Digitized by the Internet Archive  
in 2010 with funding from  
York University Libraries

規模簡古人爭看肝膽  
清新冷不邪

孝胥

鄭孝胥先生遺墨

漢世善駁則應劭為首晉代能議則  
傅咸為宗然仲淹博古而銓貫有敘  
長虞識治而屬辭被繁及陸機之斷

議亦有鋒穎而狀辭弗翦頗累文骨  
亦各有美風格存焉夫勳先擬議明  
用稽疑所以敬慎群務弛張治術故其



大體所資必樞紐經典探故實於前代  
觀通變於當今理不謬撰其校字不舒  
妄其藻又郊祀必洞於理戎事必練於

兵佃穀先曉於農斷訟務精於律然  
後標以顯義約以正辭文以辭潔為能  
事以明毅為美

李青

書實紀言而訓詁茫昧  
通夫爾雅則文義曉然

李胥

鄭孝胥先生遺墨

雲近感事詩曰藏書豈尚有名山覺其音哀以思未始  
或出也尋蘇龕書至屬序所爲海藏樓詩嘻異哉何自  
得雲言輒欲藏樓於海皮其詩慮名山如雲所謂哉若  
乃其詩則不食人閒煙火者夫雲交蘇龕二十年餘中  
亦多故矣即離合之迹蓋嘗相望於周肅慎遺墟秦徐  
福故島心目中要時時有一開徑獨行之人之詩離猶  
之合也吾郡東南一大都會蘇龕故僑青溪蓋山雲所  
宅春秋佳日四方之名者多共游讌至風瀟雨晦鐙火  
虛堂相與晤言世不遺自遠或雪屐躡巘月絃叩波興  
象既超往往於塵壒之表寫以喁于則吾兩人所獨曾  
幾何年不可搏弄也雖都會自若其岸而谷谷而陵可  
悲有在離合外者心目中益時時有一開徑獨行之人

之詩將舉似於古古亦不盡似直蘇龕海藏樓詩而已  
矣然而海不可樓海中聞有三神山樓之以度不食人  
閒煙火之詩儻亦其所顧既刊不容藏傳之天下俾知  
五七言詩故三百篇苗裔推之至邇事父遠事君有生  
大倫無能外也上元顧雲



蘇堪寫定其詩示余顧子子朋所爲敘乃曰子方草創詩話必有微言深悃可以敘吾詩者盍爲吾一長言之畧如姜白石所自爲詩敘若詩說余曰諾且爲君默記往昔彼此之言雜書之以爲笑樂余與君治詩者皆二十餘年相與商略爲詩者亦二十年初時持論若南山秋氣之相與高所謂否不稍假借用輒引爲詬病回思足自哂然亦可見年少負氣不如今之老大頑鈍譽不喜而毀不怒也君詩始治大謝浸淫柳州乙酉歸自金陵訪余於西門街則亟稱孟東野詣君案有手鈔東野詩四冊題五言古數章於上有精語足資詩學出示癸未甲申詩數十首屬爲評品題以詩題一五言古還之君乃以余詩爲精進時多過從夜談坐池旁樹下老屋

盡兩三燭而去兩家老屋皆有池有樹君贈詩所云孤  
往希真侶相逢亦冷蹤何緣疎淡意頻爲說詩濃者未  
久君將往天津作五言一首爲別自謂似顏延之北使  
洛喜余送行兩五律屢誦於陳弢庵又喜誦余建溪數  
詩余次年入都都下所知有能誦之者客天津書來言  
北地曠爽詩蘊皆盡大抵作詩亦隨地氣山川秀蘊則  
觸處成吟原野袤延則搜剔難就云云寄示浮海詩有  
風煙知異縣道里計中原云云出都詩有出門俯滄海  
登高見帝都云云今此數詩集中皆不存文人喜割棄  
少作未必其前盡不如後也已丑庚寅入都君寓可莊  
所及官學案上手鈔詩本有晚唐韓偓吳融唐彥謙諸  
家北宋梅聖俞王荊公諸家君詩已一變再變爲姚合

體爲北宋服膺荆公而余感君言作詩盤鬱往復於中者稍久其出之也必有自耐咀味者乙酉後渡海游臺北沂江游湖南亦遂變其前詩一日遇君與季直於驟馬市相將入浴堂君解衣探夾袋出殘稿數紙則游攝山詩皆七言余以爲神似樊榭君乃爲此君曰吾向未嘗爲七言去年始爲之自後相見常論七言君始於七古常獨舉韋蘇州溫庭筠然亦一時興到語所作如大阪登高感舊示李芝楣登北極閣登周處讀書臺侯府懷陳幼蓮石鐘山昭忠祠郝超漢陽琴臺子培見訪湖舍等篇皆半山遺山道園之遺何嘗爲蘇州庭筠哉君每言作詩無深抱遠趣所謂不可適獨坐者固已若處處不忘是作家而不敢極其才思誠作家矣然終於此

而已安有深造自得之境其題晚翠集云云余故以爲至言非君莫能道者君又言律詩要能作高調不常作可也老杜風急天高一首全首高調此外吾舉楊微之天寒酒薄難成醉地迴樓高易斷魂一聯惜難易作對余曰君往事夢空一聯當復過之亂峯出沒一聯與放翁之江山重複爭經眼風雨縱橫亂入樓甚相似韓冬郎云人閒易得芳時恨地迴難招自古魂非高調而落想甚高亦惜難易作對高調要不入俗調要是自家語元裕之多是高調卻無俗調高季迪前後七子喜高調遂多俗調東坡律句極少高調屬對每以動宕出之此秘發於沈佺期王右丞極變化於老杜吳都賦云欽崙乎數州之間灌注乎天地之半七律中對要有此二語



體勢沈佺期九月寒砧催木葉二聯王右丞到門不敢  
題凡鳥二聯足以當之東坡云老僧已死成新塔壞壁  
無由見舊題獨眠牀上夢魂穩回首人間憂患長簾前  
柳絮驚春晚頭上花枝奈老何酒闌病客惟思睡蜜熟  
黃蜂亦嬾飛此例極多何等神妙流動身行萬里半天  
下僧卧一庵初白頭山谷謂當是初日頭曰豈有用白  
對天東坡曰黃九要改作日頭不奈何他往時葉損軒  
作律句對語喜工整余常以此例語之損軒頗從余言  
後又復其舊步沈子子培稍護青邱七子者余曰留客  
山中生桂樹懷人江上落梅花在七子中最爲清秀然  
亦著眼此桂樹梅花而不能舍耳若雪滿山中月明林  
下函闕月落華岳雲開皆所謂干卿何事者抑人人適


秦皆有一聯華岳三峯潼關四扇將若何放翁云老夫  
合是征西將胸次先收一華山則真能負之而走矣戊  
戌君來鄂所居隔一江歲暮約相督爲律詩余因言作  
詩起調不落凡近易結調不落凡近難君則言作詩用  
利筆易用禿筆難謂余寄弢庵送子培詩中有能用禿  
筆者殆即書家折釵腳屋漏痕之說耳大抵詩要興象  
才思兩相湊泊有惘惘不甘之情不自覺其動魄驚心  
迴腸蕩氣也有自然高妙之旨乃使人三日思百回讀  
也李衛公之獨上高樓望帝京王荊公之南浦隨花去  
東坡之但有尊中若下元遺山之落日青山一片愁各  
絕句皆李嶠真才子語能使人悵惘損志者白樂天之  
一道殘陽鋪水中絕句坡公之雨洗東坡月色新決去

湖波尚有情江東估客木棉裘竹外桃花三兩枝各絕  
句荆公之鷗鳥一雙隨坐嘯荷花十丈對冥搜丈夫出  
處非無意猿鶴由來自不知試問道人何所夢但言渾  
忘不言無無人語與劉玄德問舍求田意最高久聞陽  
羨溪山好頗與淵明性分宜但願一門皆貴仕時將車  
馬過茅茨黃山谷之翰墨場中老伏波菩提坊裏病維  
摩近人積水無鷗鷺時有歸牛浮鼻過陸放翁之江頭  
漁翁結茅廬青山當門畫不如恨渠生來不讀書江山  
如此一句無我亦衰遲慚筆力共對江山三歎息皆可  
云高妙者姜白石人生難得秋前雨一首文與可此君  
庵之我常愛君此默坐勝見無限尋常人亦庶幾姜白  
石甚似孟浩然文與可頗類韋蘇州與浩然同時有李

杜摩詰皆推服浩然與白石同時有尤蕭范陸楊皆傾  
倒白石白石如哭石湖寄誠齋等篇集中亦不多遇也  
又余嘗語君詩爲友朋而爲者居多然往往有數友朋  
焉爲彼爲之而常工爲此爲之而不盡工者豈其意之  
屬不屬如靈運所云對惠連輒有佳句歟然又有刻意  
求工而不工不刻意求工而轉工又所謂伋興而得者  
歟二者事理乃相反則或者其工力之至與不至不至  
者不刻意則轉工天之事也至焉者意所不屬亦天之  
事意所屬又學之功歟子培工爲詩而不常爲嘗言吾  
遇蘇堪則詩思自生爲之亦多工弢庵詩爲謝朓如張  
幼樵而爲者常工於他作蘇堪工者固多而爲子朋而  
作者則尤工且無不工是數者於前數說必有合者也



君論詩宗旨可聽者實多以余妄見向多已合復離近  
來亦罕有所異同然彼此亦垂垂老矣乃尋檢所存往  
來詩札及平日所言記爲誰語與不記爲誰語者皆書  
之以復於君壬寅二月十日陳衍敘



海藏樓詩卷第一

閩縣鄭孝胥

春歸

以下已丑

正是春歸卻送歸斜街長日見花飛  
茶能破睡人終倦詩與排愁事已微  
三十不官甯有道一生負氣恐全非  
昨宵索共紅裙醉酒淚無端欲滿衣

六月十六日觀洗象

去年英吉利滅緬甸

宣南洗象迎初伏萬騎千車夾水看  
法駕舊儀從鹵簿玉泉新漲試波瀾  
蒲甘國破封難復莽氏民存業遂殘  
留汝南荒遺老在可堪有齒已先寒

九日獨登清涼山

科頭直上翠微亭吳甸諸峰向我青  
新霽雲歸江浦暗

曉風浪入石頭腥，忍飢方朔非真隱。避地梁鴻自客星，  
意氣頻年收拾盡。登高何事叩蒼冥。

題顧子朋齋壁

在龍蟠里曾沈左諸祠之側

客去晚窗明，行吟山鳥驚。殘陽一峰靜，秋水半潭清。  
几席餘文字，祠堂近老成。終知歸寂寞，徙倚若爲情。

雨中宿子朋齋臨烏龍潭

幽人默相感，衝雨命藍輿。樹暗城西路，雲深水北居。  
添衣攜短褐，共飯洗芳蔬。庭鶴聲誰警，潭龍氣自嘘。  
對眠清榻冷，立語暮鐘疏。世事堂堂夕，山中夢熟初。

吳氏草堂

雨後秋堂足，斷鴻水邊吟。思入寒空風，情誰似楓林。  
好一夜吳霜照影紅。



水痕漸落露漁汀  
禿柳枝疏也自青  
喚起吳興張子野  
共看山影壓浮萍

人日登陶然亭

以下庚寅

春來料理喚吟朋  
暖日江亭便可登  
林杪山光能映酒  
蘆根泉脈欲銷冰  
閒曹蹤跡人誰覺  
老輩追陪我亦曾  
猶有後山同刻意  
故應風味愛盲僧

僧宸寺有盲住持陳弼宸太史與之熟

贈許豫生下第南歸

西笑頻嗟宦未成  
故山還我舊才名  
春衫浣酒重尋夢  
紈扇題詩又送行  
海上閒居娛壽母  
朝端知己說門生  
南歸垂翅吾猶羨  
姜被多年冷弟兄

爲王幼霞閣長

鵬運

題易安居士小像

南渡遺簷流人伍  
老去才名誰比數  
歌辭激憤一世無

小朝廷人真愧汝畫圖省識古詞女比似黃花瘦幾許  
趙侯贊之署德父政和四年歲甲午胡馬未窺想甯處  
歸來堂中正媚嫵生小聰明喜自賭金石圖書闢記取  
暮年作序戒好古叙述亂離備悽苦何來雲麓與茗溪  
未識紹興老命婦建炎繫錄尤莽鹵俞君編緝年可譜  
行跡章章儼對簿半塘老人幼霞刻樂府殷勤軼篇手  
接補摹圖徵題更誌語表微事較好奇愈茶蘼雲巢今  
何所趙明誠著石名雲巢又惟有流傳漱玉詞坐覺清  
暉照眉宇有茶蘼畫卷皆傳於世

官學雨中與陳笙陔夜坐

宣南五月翻階雨二客虛堂坐渺然聊喜素心共今夕  
忽驚浪迹近中年清談忍刺當時事歸夢貪尋自在眠

來日閉門同索句便從正字證詩禪

馮園看牡丹

出郭車聲不厭遲尋春聊赴好花期園林客裏重游地  
風日樽前絕豔思孤宦正堪棲物外壯年轉易觸兒時  
阿翁軼事誰能說感激初聞訪友詩

馮乙亭世叔爲  
余誦先考功詩

官學雜詩

家拏寄人食一身居都門誰言不易居寢處長苦閑書  
倦俄欲覺諸生誦已繁取書與相和夢我升角年從嘲  
先生癡涸轍枯微官尚憎鳳皇池今爲鵝鴨喧豈知無  
巢者暮雨鷗飛翻十旬沈我書方寸叢憂患耐閒特不  
易所學誠空言

今年本苦旱一雨遽浩浩桑乾既北決滹沱亦南倒畿

民半漂沒千里勢如埽

皇仁雖亟賑豈免窮無告致災大臣咎幸已寬譴誚夫何反行樂張晏恣燕犒吾

皇富春秋左右賴輔導誰司致君責老智詎稱耄位卑固有罪悲歎心孔悼

五月六月交雨勢晝夜大中宵聞詔呼巷屋紛倒壞朋親斷奔視消息各狼狽忍盒庭柳拔乙盒牀書敗經旬覲簷日雲意仍靉黷衆情餘震懼傳說播靈恠迺云蘆溝絕蛟螭騁狡獪豐臺十數鄉築堰幸自衛河神蛇服出巫語索祭賽方當風雨黑昆明勢尤倍神鐙見十三倏忽助澎湃或言乃龍目激波湧隄外行宮牆甫合蕩突渺疆界奔騰誰能遏閫若潮自退游幸非所宜毋乃



神祇戒老黿過城隅容與狀無畏都人夙好事填道雜  
粉黛陰姦競得意熟視但我輩

公卿喜接士清望雅所歸良莠雖雜陳此意未可非謂  
彼爲士者豈無以自居謹身保令名庶足酬已知如何  
務苟得暮夜靡不爲坐令倒屣人鼠璞遭世譏少年固  
可爾垂老胡乃癡陰求或不饜恚怒仍怨咨紛吾二三  
子名盛毀亦隨朋友有難言我懷良鬱伊

習靜必於動解人無不可馬足復車塵中著曹騰我側  
肩入戲場里耳聚已夥衆生等螟蛉吾豈殊果羸繞梁  
遇法曲賞音久亦頗持此較奔波所得詎么麼

冷淡自爲歡所居必移情今年青谿傍欠我勃窣行畫  
舫絃管脆草堂風月清底用持誇渠政缺一水橫日西

引散步巷尾欣未經豁然得縱目迤邐帶高城初來尚  
見底再來波遂平石橋偶俯眺塵顏寫空青王郎鬱蔥  
蔥林中露飛薨垂鞭馬上郎何物生甯馨歸來急作書  
記此眼暫明江湖是吾性朝市非公能

家書至卻寄

書來意萬千隔此紙一重持翦手自發尚恐讀易窮向  
來喜夜書鐙花剔幢幢墨淡字斷續體勢殊未工實亦  
無所語但道無恙儂欲知許時事丁甯尋歡悰生理本  
可笑日對蓬髮僮甚思逐春游出門成孤蹤正月月圓  
時斜街鼓鼕鼕二月月圓時我在官學中詩就還獨吟  
書史頗亦攻署中時來云某日當趨公賃車便應去車  
聲何玲瓏友朋有幾人旬餘或相逢笑談破無俚神情

終恩恩說歸漸可厭畫餅飢豈充回頭看庭樹誰能送  
飛鴻

大七點可憐歲暮甫斷乳孟冬我行時識字已百許渠  
姊強解事笑語頗楚楚見舅肆頑癡姪姪聒大母小七  
雖未周神氣溢阿堵汝身尚抱疾課讀底須苦十三畢  
經書那不見渠父今年過三十偃蹇困塵土微官羈輦  
下劇似搬薑鼠更無旁人嘲餐飯講訓詁昨朝值無事  
出城日當午道傍見籠雀傾囊喚買取開籠瞥四散幸  
未傷翅羽追飛似公姬啾唧上鄰宇放生事大好願力  
庇兒女更求得暫歸歸時汝應愈

寄栗生兄

藿鹽未了持家事燈火惟餘課弟編料理兒曹聊晚計

浮湛閭里忽中年好乘佳日舒心眼莫遺新霜拂鬢邊  
準擬江淮乞郡倅爲兄先辦杖頭錢

枕上

閒身急景暗中過枕上方驚去日多月影漸寒秋浩洞  
埽聲彌厲夜嵯峨養生候密須逢子學道心繁總著魔  
是事故應思熬爛不將美睡換奔波

學道之士必  
以子時脩煉

八月二十八日夜坐時將出都

宵涼百念集孤燈暗雨鳴廊睡未能生計坐憐秋一葉  
歸程冥想浪千層寒心國事渾難料堆眼官資信可憎  
此去夢中應不忘順承門內近

觚棱

出京



坐看林葉黃已有難留意秋陰積離色送我以寒吹親  
朋裁三五念別數相詣去來自細事所歎迫生計翻然  
狗微念赴之頗沈驚甯辭長途勞聊免他時悔海波千  
萬疊適志即平地驅車出東門眇默身如寄

伯潛約游鼓山

風雨危前諾中宵喜見星夜寒依竹轎曉霧出茅亭滄  
海歸人瘦孤峯向我青入山真恨晚舉首媿山靈

聽水樓偕伯潛夜坐

人閒可語轉寥寥默坐空山盡此宵月黑忽驚林突兀  
泉枯惟對石嶢嶢宣南氣類今難問樓上詩魂我欲招

樓懸淨名  
菴此詩

莫便相逢恨岑寂明朝分手馬江潮

東坡生日集翁鍊梅齋中

江上殘年我又歸高齋雪後正添衣終知此老堂堂在  
賸覺虛名種種非酒半題詩忘客去香中讀畫愛梅肥  
聚山樓外山能識只欠相攜看夕暉

薛廬同子朋待月

欲雪城西嘗對飲舊游新歲感崢嶸平生已畏論懷抱  
湖海何緣識姓名湖南人某君題詩壁間謬有入寺看  
鄭張之目張謂通州季直江孤閣冷烹魚炊稻暮鐘晴與君晚遇良非淺小待梅  
梢好月生

遊棲霞泊舟下關尋三宿巖題字不得

寒鴉衰柳點霜天好放城根下水船歲暮暫尋招隱客  
年來深欠入山緣江光月盡空含影是日人語宵分漸  
墜烟惆悵精藍三宿字吟魂夢倚洞龍眠

登攝山最高峯

每愁飛鳥滅雲端石磴行來倦百盤  
鍾阜雲開分晚照吳江楓落入新寒  
名山誰信身堪隱世事終憐劫未闌  
直恐哦詩增客感松風還爲卷波瀾

桃花澗有石刻非人閒三字

雙澗分流出翠微春來紅雨想沾衣  
桃花曾見先皇日真覺人閒事已非

南巡  
行在亂後盡圯

棲霞市舊傳徐鍇子居山前設茶肆號徐十郎  
茶肆有鉉自江南初入朝授官誥云歸明人僞  
銀青光祿大夫守太子率更令云云如內史乃  
江南宰相也銀青存其階官也見攝山志

街名最愛棲霞市兵火荒村定幾經欲攷江乘圖髣髴  
漫過茶肆客零星溪流抱寺通漁艇山色開門展畫屏  
聞說徐家存誥敕可堪尋看僞銀青

正月二十一日城西步歸作

以下辛卯

艤徧江梅更惘然東風吹面又今年春山漸綠荒煙外  
野水徧明落照前誰遣旁人覺哀樂稍從浪迹悟因緣  
尋思光緒承平日好辦閒身付酒邊

鑑泉聽事懸畫龍子朋詠之余亦繼作

黑雲湧出極可畏中有鱗蟲得熟視離蟄奮飛恣遊戲  
咫尺真愁雷雨至闕角諦尋悉題字辟火曾云著靈異  
董源筆歟或黃筌寄此蒼茫神靈意吾聞神物善自翳  
見尾向來羞爾輩

畫中見其首尾

抑鬱無言短人氣老子平生



甯足貴

吳氏草堂梅花下作

今年又見江梅發  
歎息勞生幾往還  
淡蕩風香春欲半  
蕭寥煙日地常閑  
牆陰活計添新竹  
籬角幽情帶好山  
莫管花前詩力減  
憐渠歲月不教刪

雜詩

城西朋好誰相憶  
定是丁陳與沈黃  
海上昨逢潤州守  
一時回望奉先坊

下斜街金之奉先坊可莊所居丁陳謂叔衡彌宸沈黃謂子培仲弢可莊

時出守鎮江府

江海論心有幾人  
葆真季直最相親  
治河策上仍爲客

種樹書成未療貧

葆真游河帥幕中季直家居方究樹藝之術

石頭城西去來客  
路熟深慙蓋山碧  
山下詩人顧石公

念我狂癡時歎息

扁舟京口留三日北固山頭別酒明珍重贈言吾過矣

著書用世太勞生

將之日本忍龜藏余於北固賦詩云云

螺髻瑤簪倒碧空長崎山色似閩中出門十日忽至此  
歸夢可憐千萬重

高松保郎詩

斷腕高松氏歌者良紛紛四坐且勿喧聽代保郎言保  
郎家江戸事在明治前少小無所知但念知己恩藩法  
時方酷義父抱深冤獄急待自殺營救窮百端俱死猶  
不解智竭惟有身探懷出白刃霜光蝕我魂低回語左  
臂全歸愧難全斷者不復續今日與汝分欲下齟牙斷  
神鬼號右邊誰知父母軀彼此乃相殘一揮何時落昏

絕耳不聞俄然視白日豈意猶生存收我刀如風滌我  
血翻盆修書仍函腕馳獻辭悲酸義父幸得白殘軀越  
中年支體已不痛沈痛在心肝賣藥溷市人懺悔向世  
尊衆生有疾苦莫似我艱辛大清黎公來遺我以古文  
李公尤慷慨陳義高青天保郎身見在保郎名已傳會  
有義士知熱淚墜衣巾人生歷情劫憂患深相纏本心  
要不昧君子或見憐保郎骨可朽義士淚不乾

花市

秋後閒行不厭頻愛過花市逐閒人買來小樹連盆活  
縮得孤峰入座新坐想須彌藏芥子何如滄海著吟身  
把茅蓋頂他年辦真與松篁作主賓

八月二十六日芝口張欽

豪舉京華在眼前誰知海外有今年客中總覺朋尊樂  
酒後差憐粉黛妍鐙影自繁無月夜桂香微動欲霜天  
歡場那落中原後聽罷清歌莫惘然

九日愛宕山登高同秋樵袖海

秋懷閉戶兀嵯峨都付登臨眼底過蠻菊那知佳節重  
日本舊用中曆明治以來改用西曆矣霜林也傍醉顏酡樓西地盡鄰斜  
日海上帆收展夕波愛宕山頭三客望鄉愁誰似舍人  
多

形贈影

學道未爲晚新持胎息經疑心存日景行氣攝神庭情  
在妨飛舉身微混醉醒對君終不愧勿復患頽齡

影贈形



用意君良苦崎嶇欲勝天拙遲期得巧後發待爭先世  
運行一變人謀無萬全就陰應可息吾已倦周旋

神釋

萬化有消長而非減與增短長初止此得失亦何曾知  
退甯渠黠好謀詎爾能唯當量心力興到徑須乘

麴町

簷牙初日下霜風坐看窗前半樹紅稍喜書聲侵夢寐  
乍憐秋氣入房櫳曉寒峭後衣頻著淺語拈來句未工  
誰念詩人漸消瘦麴町館裏送歸鴻

江之島夜宿巖本樓

潮頭未沒一痕沙來處回看隔浪花氣暖洞天巢蝙蝠  
山貧夷戶賣龍蝦燈前歸夢愁難熟浦口遙峰認欲差

卻笑含情呂居士偏將情感證無邪

秋機有思夢  
寤而自憐焉

王子飛鳥山看紅葉飲扇屋

有山曰飛鳥似我射鳥不

射鳥山在  
福州城中

在高樹紅猶淺回谿

響更流烹魚憐女手把酒愛樓頭莫厭三年住堪成一  
笑留

贈鄭翰生

玉軒京卿之猶子

君於我厚矣不鄙謂我語所云詎無謬政自出肺腑聞  
君道賢伯老輩具風矩門中足師法豈復假外取親賢  
遠不肖此事已為主性情端且厚俊哲必樂與文字藝  
之末費日浪自苦但當勤讀史大義了今古自居在何  
等肯作流俗伍知君多良友走也豈足數離居儻相憶  
莫哂渠言腐

送樗弟入都

以下壬辰

與子同出都十六年於茲子今復入都良甚喜以悲兩  
兄雖未老皆異年少時事業那可說所憂寒與飢我如  
風中船奔濤猛相持不怨漂流苦但恨常乖離何時得  
停泊甘心趨路岐向來盛負氣不自謂我非進士棄不  
求從人詬狂癡念子行入世科第政所期閨士多褊狹  
此語古已譏器閥乃受大要須力戒之何物益神智讀  
書烏可遲吾今之所行世人詎見知似傲非慢侮似倦  
非摧頽寸心虹貫月子胡愁我爲

上海旅次寄京中友人書

送樗弟入都

惘惘重經黃浦灘霜鎧照徹月千盤潮喧樓外車初過  
雨迸尊前曲未殘入洛士龍成獨往傷春小杜罷追歡

修書麤說江湖意已覺春陰到指寒

二月廿七日集沈祠文肅公生日

在龍蟠里  
烏龍潭上

一見斯人悵永藏病中猶自意堂堂流風可但興吾黨  
後起誰當望鴈行入幕往曾依肅毅游吳晚及接忠襄  
若憑目擊評風節公論年來有短長

潭上祠堂拜此辰傍祠潭水碧鱗鱗石城作里崇遺愛  
嘉樹成陰表好春寂寞廟廊虛一老輪困肝膽向何人  
趙州澆酒平生感斜日沈吟忽滿身

立秋永田町日枝山下新居作

日枝蓄深蒼細巷藏山麓清谿復繞巷彌望但高木西  
尋巷欲盡地落窺我屋入門勢稍遽紙窗晝常綠纍垂  
柿與梨離立松與榭連楹作磬折三面成五曲閨人愛



西南臨水好送目東軒尤蒙密敷坐客所肅距軒北二  
椽宜以棲我僕周遮望若隔呼喚應頗速跳梁便兒女  
飲噉足蔬肉旬餘困坐起月許忘局促丁甯促灑埽婢  
媪額屢蹙比鄰各勤潔詎可愧彼族雨簷報晚霽片月  
如涼旭晴鐙鬧流星繁絲壓孤竹奔車湯忽沸推枕聲  
在褥中宵起舒嘯夜氣漫林谷鄉心茫欲碎離念牽更  
酷我愁婦亦歎身世付轉轂中原民情敝隱患在心腹  
此邦俗亦偷交誼聊云睦誰能任茲事起造斯世福微  
官欲何道一飽忍千辱悲呻久不寢人世寐正熟雞  
爾誰戒向曙強呻喔

雨後徒步入署

溼雲重難起雨氣夜不小河隄決屋頂洶洶遂至曉新

涼睡味美驚覺訝非早披衣趣具食雜進殊草草出門  
溝澮溢未敢怯途潦因思宵來勢疑恐小樓倒樓前甫  
拆屋東北豁可瞭斜風時蕭蕭遠樹淡嫋嫋低頭或終  
日書史麤省了近來罷午餐薄粥潤吻燥朝夕出無車  
縱步自輕矯他人笑吾吝彼淺惡知道壯夫事事可妙  
賞恃懷抱使吾行負擔亦足營一飽

作書久不能進憤然賦此

作書無難易要自習之久苟懷世人譽俗筆終在手古  
今祇此字點畫別誰某必隨人作計毋恠落渠後但當  
一掃盡逸興寄指肘行閒馳真氣莫復搏土偶時賢爭  
南北擾擾吾無取狂奴薄有態或者進援叟達哉臨川  
言妄鑿妍與醜

王荆公詩誰初妄鑿妍  
與醜坐使學士勞骸筋

答袁爽秋

蹤跡宣南闊情懷海外孤佳書能見及妍語故多殊島  
族滔新法賓僚跼腐儒默慚袁伯業勤力久過吾

黎受生遺鄭子尹書四種及巢經巢詩鈔

吾年十二熟儀禮閤誦全部色不撓爾雅急就亦宿讀  
當時恚渠云等道長大孤露事舉業文辭頗復心所好  
數年之閒失八九偶取溫習翻苦奧治經念自小學始  
桂段嚴王手勘校久聞遵義未得見逸字汗簡名尤噪  
漸憐歲月去飄忽精力無成坐消耗君今遺此令我愁  
便恐悠悠迹如埽鄭君樸學仍能詩瘦硬偏工兼澹妙  
一生自哀獨何事得喪何人爲計較不如學道積豪髮  
入世差同飢可療養心聊復期盡年火速捐書真得要

川和村看菊途遇雷雨返飲神柰川丁子屋  
秋來足風雨已自負重陽佳日天公妬黃花異國香郎  
當游亦壯調笑意殊狂我輩人誰識胡姬儻不忘

冬日雜詩

以仰視皇天白日連爲韻

此日不足惜去我逝安往山風剝庭葉晚意太鹵莽甯  
知吾送汝對景聊俯仰經行萬馬中駐足看擾攘乃於  
瞥然際而作攫取想用意如許毒所得徒自罔

日人行新法中國始遣使華民我自轄諸國不得視彼  
非不欲爾實亦勢所至來者更五公交涉畧可志吾初  
檢案牘抄撮取關係會以事不竟訖未就編次又觀圖  
書館典籍亦略備盡蒐爲目錄頗足資攷異遷延顧莫  
往猶未墜此意



運會今何世更霸起西方誰能安士農唯聞逐工商賈  
胡合千百其國旋富強此風既東來凌厲世莫當日本  
類兒戲變化如風狂天機已可見人心奈披猖誠恐時  
無人禮義坐銷亡豪傑皆安在俗倭空張皇

麴町往築地正出東海灣諸胡所聚居樓觀映晴天不  
知夜何事聚衆張几筵童婦齊列坐施帷當其前數人  
類作劇笑怒相與顛下帷俄復展一人口有宣學語殊  
未熟時省懷中編主人有四女髻髮各垂肩碧眼若含  
愁絲服何蹣跚入帷迭嬌歌觀者咸稱妍衆中都爲誰  
舍人在其閒舍人學胡語彼胡奚知焉讀書二十年此  
舉誰謂然吾意顧有在未足爲俗言

兒女寢已熟瞑坐自數息十年流浪蹤一一過胸膈朋

輩可遠大要自念季直長吾四五歲屢歎厄通籍葆真  
雖通籍隨衆限資格未知誰有就命運難可測忍盦稍  
深穩所守當不易自餘迫世務輒熟那足責平生甘賤  
售拋擲良弗惜自貪茲游奇兼可穢行迹推門獨起旋  
喋凜霜月白

此都號文士浮躁多不實盛名如賴襄語助未究悉黎  
公昔在茲求士惟恐失芝山歲再會賦詠積篇帙求其  
麤可者百十未得一善吾有長尾

名楨  
太師

後起實美質吟

詩輒曉意作字且秀潔墨江望之夜煙水上滿月筦絃  
喧我醉詰論忘筆舌如渠齒方穉才氣已奔軼前賢那  
足畏好自奮今日歸來得惆悵嗜此誠癡絕

猗嗟我從祖高行世所獨有時聞微言終身在初服孤

露薄有知所賴見尊宿今年吾道苦此老夢已覺別時  
知難再揮手反見速衰顏一何瘦忍淚竊注目不殊辭  
所生摧割痛在腹未曾聞怛化每憶已自哭理當棄妻  
子卒侍啟手足何言迫生計恨媿滿衷曲因思議私諡  
介節誅不辱雖然異出處知己配文肅哲人萎二老願  
見那可復吾其放於夷猖狂混清濁

南河縣尉王寅侯死賊詩

挺身追語賊父弟得生全爾輩可殺我微官甯媿天彭  
修今復見趙孝世終傳高位多媿活吾因表此賢

日枝神社晚眺

望眼能令意暫伸門前假我小嶙峋入天峰影長含雪  
照海波光已釀春屈指交親增恨別亂思文字賴忘貧

少年心事行看盡憂患人閒待此身

亂思遺老出趙  
坡孟子題辭解

朝鮮權在衡招飲觀梅

雪消江戶春滿枝權君招飲不得辭已看名士同來盛  
況是明月初圓時官梅登盆映銀燭使星入座臨酒卮  
逡巡開筵極豐腆食單時尚從歐西淳熬擣珍炮糝漬  
漿水醖濫醅醑醑左殽右載近古法葡萄論斗行如淮  
主人殷勤善言笑客不解語惟解頤酒酣登樓望天際  
鄉思正與寒雲迷烹茶卻喚看影畫亦有巾幘攬須眉  
德法二主信時傑猛很欲作鱗之而誰知異人華盛頓  
狀貌酷類枯禪師雄豪百鍊至平淡中外一理元無疑  
盛衰天道迭倚伏會有能者同華夷霜風吹面醉漸解  
歸舍兒女猶唔咿汪君翌日幸語我大夫以下皆爲詩



我雖強作用我法措語蹇澀愛者誰

栗兄書言荔支老樹枯矣因感念介節叔祖

歲星入望魯靈光此樹婆娑共可傷不見賴蚪虛老屋  
載尋白髮亦空堂披書海國懷難遣照影池波夢豈忘

樹臨面

此院叔祖亦居院東

居憑仗阿兄勤點綴春寒更與

種修篁



海藏樓詩卷第二

神戶理事署樓中雨望

以下癸巳

危峰鬱鬱浪蒼蒼對此茫茫我亦忘時命看天終獲落  
雨風注面暫清涼華民力屈愁微業島市風移足老羌  
海內故人應絕倒便從窮髮問行藏

七月七日官舍風雨中作

四圍山海一身蕭慙落欽崎自笑狂天際雲濤秋益壯  
樓頭風雨晝初涼操心稍悟安心訣更事翻思忍事方  
獨有韋郎言可念俸錢虛愧對流亡

寄酬秋樵贈別之作

秋風夕起憶秋樵高館人稀暑漸消誰解微言長耿耿  
時吟清句便超超等閒未悟歡難繼他日方愁跡更遙

身世政須容度外莫令相見減風標

夢烏山因寄怡舅

外祖母在日所居屋在烏山下地名山兜尾

萬疊悲歡逐境空烏山只在夢魂中  
淚痕自共華年積心事真看隔世同  
此日諸甥多失母新喪高氏從母即今阿舅亦爲翁  
山兜老屋如重到惘惘斜陽巷尾紅

九日大阪登高

霜風連朝作重陽蕭寥坐落無人鄉  
端居秋氣最先感起與蟲鳥爭號翔  
樓頭山海自圍繞於意不樂如羈縻  
逝將去此更一縱瞬息百里遙相望  
未花蠻菊那足道眼底正喜落日黃  
登高聊欲去濁世負手天際終旁皇  
空中鳥跡我今是底用著句留蒼蒼  
故山歸隱有兄弟倒海浣此功名腸



懷人亭 并序

自余東游日本朋好睽隔時有投荒居夷之歎子朋  
子培爽秋皆有詩見寄子朋詩曰早日忘形歡太甚  
如今舉目覺都非子培詩曰日下雲間虛想像奇花  
秀竹澹淹留又曰秋半有懷憑海客太虛明月近誰  
圓又曰久息朱絃遲歎唱爲撫蠻語入詩篇神戶理  
事署中有茅亭九月十三日清晨獨登之雲濤滅沒  
曉日激映其蒼茫之致足以迴腸盪氣撫然良久乃  
名亭曰懷人仍系以詩

孤亭雲海渺相思獨上惟吟憶我詩從此故人感天末  
不妨來此立移時

海色微茫自入簷亭中最好眺風煙如今題作懷人地

白鳥滄波共惘然

述菊

天涼意便好秋高詩欲長菊花爲時出見之輒神往島  
人亦好事聞地據高爽歛錢乃縱覽婦穉雜擾攘連棚  
往復還種色競題榜輕寒媚海日千本各俯仰就中半  
束縛佳卉失侑儻誰令爾生茲逸士墮塵網來歸伴蕭  
齋吾不汝抑枉

離宮峙赤阪國主開秋會殿香黃花前池明丹楓外羣  
胡掉臂來牛酒肆啖嚼先生獨微歎霜英誰解穢橫濱  
有民園林谷頗映帶花時不辭客異種亦不賣川和嘗  
一往其盛又數倍中途遇雷雨當壚笑我輩不如坐寒  
齋一月可相對從渠各爛漫妍醜置弗恠雖然不解飲

曠懷天所醉人生何者難難在同臭味使我重懷人斜

街來夢寐

川和村名土地廟斜街京師花市所集

望月懷沈子培

天風海色颯成圍獨倚三更萬籟稀不覺肺肝生白露  
空憐河漢失流暉東溟自竄誰還憶北斗孤懸詎可依  
今夕太虛便相見屋梁留照夢中歸

傷忍盦

彼蒼不足恨人事實可哀莫復念忍盦念之心膽摧烈  
士盡奪氣況我生平期四海盡驚歎矧我夙昔懷聚時  
不甚惜皎皎心弗欺別時不甚憶落落意弗疑如何無  
窮志殉此七尺骸交情日太短天絕非人爲命也審如  
此終古甯可追

朝士重清流此風亦久息不隨薄俗移通介見所植抗  
言得棄外天日無慚色誰知活人手未恨江湖窄爲民  
奮請命有此二千石世閒汚吾子捐去誠上策但縻老  
親淚冤苦滯魂魄當時殉名人著望各藉藉貪夫溷烈  
士事定衆乃白公等當期頤王濟我恨惜

張綺季屬題小金井觀櫻圖

海山盡道是蓬萊悵望羣仙去不回偶約尋春向江戶  
又疑失路入天台玉顏一隊連雲出金井千株枕水開  
應念此花太岑寂長教我輩畫中來

生女七日而殤

夫何而爲人骨肉亦已具奄忽遂物化掣電未嘗駐微  
質倏去來我意初不悟兒曹何所失灑涕向暗處有無



旋相生常理自成數久視或偶然沈吟山色暮

感舊示李君芝楣

浮生百事苦難就所貴得意當我身吾力能爲未敢必  
況乃假力於他人皆云未至時有待傷哉心膽幾沈淪  
往年都城盛朋友緘齋忍盒情相親激揚掩抑性雖異  
用意沈著不可言倏如花落風雨過置我惘惘銷精魂  
向來緘忍竟何得俯仰各已歸九原甯當入海尚負氣  
癡念志業空窮年憶嘗吟詠戲相勸檢視遺句餘悽酸  
今者聊欲託此事天道弗忌當長存心知寥落誰與語  
驚歎李君下筆真君儻感此可共作精力足用毋遽巡  
決壁施窗豁然見海題之曰无悶

海天在我東胡爲伏暗室容忍久不決奇境真自失庸

流那辦此此祕待余發君看五尺地慨若收溟渤開來  
一據案意氣與天逸滔天自橫流而我方抱膝窗閒獨  
偃蹇萬象繞詩筆監儲奮清狂作事衆猶慄前身疑幼  
安遜世送日月

清友園探梅

以下甲午

海波淡對道人閒勝日清游一破顏誰見春風甘寂寞  
朱霞白鶴滿空山

山圍脈脈發霜枝隴首無人夕照移一段荒寒誰解賞  
松梢遮莫揭春旗

嫩藥疏枝點碧苔盈盈纔得幾年栽他時屈曲山中老  
長記先生爲汝來

天空海闊須磨驛山靜日長清友園流落中年仍世外

梅花數點憶中原

日人求爲題關張畫像

關張非猛士浩氣與百世海外猶敬之豈不以好義畫師亦可人胸無功名意筆端小裛鄂於此知見地

櫻花花下作

仙雲昨夜墜庭柯化作蹁躑萬玉娥映日橫陳酣國色倚風小舞蕩天魔春來惆悵誰人見醉後風懷奈汝何坐對名花應笑我陋邦流俗似東坡

嫣然欲笑媚東牆綽約終疑勝海棠顏色不辭脂粉汗風神偏帶綺羅香園林盡日開圖畫絲管含情趁豔陽恠底近來渾自醉一尊難發少年狂

脈脈輕陰壓輭塵閒愁漸逐柳枝新清明寒食初驚豔

穠李夭桃不當春薄醉乍蘇沈宿夢凝妝纔就寫全身  
亭西振觸年時事錯認東華絕代人

看到繁枝處處開韶光駘蕩錦成堆春歸滄海剛三月  
骨醉東風又一回花氣連雲收暮雨濤聲催晝送輕雷  
道人摩眼空吟望無復當年側豔才

花下又作歌

海波照天花照地偶著詩人作園吏園小偏收海外奇  
詩成便向花前醉天明海搖日自沸園花嫣然皆破睡  
十分奇事盛風流百隊紅妝各纖媚懷人亭前凡幾樹  
棠質櫻神極穠粹日薰已覺玉肌香風過尤憐粉光膩  
多情好事餘習氣論詩惜花恣遊戲彼都共語更有誰  
只合喚花作吾輩



風雨花盡

昨夜仙官下取將海天風雨徹宵狂  
名花身世真堪羨  
烈烈轟轟做一場

風雨既過有二株粲然獨存憮然賦之

飄風疾雨萬騎趨欲救不得嗟羣姝朝行我園太狼藉  
飛雪宛轉縈衣裾眼看衆枝各含怨頓抱芳意歸空虛  
春和景明若有失驚顧忽出悵惋餘朱顏亭亭獨無恙  
憫默俯立嬌難扶驚魂漂搖俄欲返幸脫浩劫尤憐渠  
先生歎逝賦未就念汝失侶同羈孤徘徊繞樹復顧影  
苔深泥污聊相於盛時未闌奈零落山河邈隔空愁吾  
三十五歲初度

令名殊不果三十又過五已孤輕歲月棄擲那足數少

壯等戲劇熟思極無取從今脫皮膚真實聊自補結習  
患難盡術業且莽鹵妄懷當世意則脫窮宇宙百年戎  
狄運天道未有處小須會事發收拾入年譜吾知詎有  
涯懷哉養生主

詠盆中白牡丹

神如皓月元來淡氣帶春風些子寒海外更休嗟寂寞  
白花猶自伴朝官

用白傳詩意

倭中亦解重花王苦爲櫻桃說擅場他日教知南漢事  
也如北勝對南強

焚鴉片十餘篋及吸器百許具於署之末隅仍  
灑灰於坎以滅其跡

嗟嗟中原今何地情民億萬天弃之我生不辰遣觀此

酖毒流染甯可醫朋親故舊無免者白晝枯骨行纍纍  
九州沃野不播種益藝淫藥戕子遺國家又從征其利  
漏脯鳩酒取療飢四鄰擲掄幸吾禍君相縱省吁已遲  
侯官文忠不勝憤焚排匪顧大患隨戾時天道定深嫉  
投死志業終難恢我今何者不自量仇視妖物忘傾危  
昇炎揚灰聊洩怒旁觀震駭顛且趨背後豈免競嗤點  
我實兒戲而毋譏九原死友尚不諒眼前佻巧誰吾知

可莊嘗謂胥惡之已甚終將自蹈之也

敬題 先考功書扇及畫爲羅少畊觀察

阿翁在世日獨善道不屈世人誰知之翰墨聊自悅人  
閒合有幾邈若湘江瑟生氣長凜然孤兒眼中筆

氣鬱出游

渡海就寂寞於人吾何尤索居亦已久豈免懷朋儔島  
中波春天惟見日月浮平生氣難冷有如鳥被囚解衣  
浴湯泉脫屣登山樓定知我非病孰解中何憂據尊天  
茫茫欲醉獨無由看人好懷抱狂婢恣綢繆振衣去不  
顧一笑誰能留

五月十五日神戶月下

搖搖林際海旋明耿耿樓頭月又盈一道玉虹蟠夜色  
千尋銀闕卷濤聲平生入世懷將盡物外孤吟影太清  
今夕方諸應湧淚故人何處徑騎鯨

自住吉游有馬入山雜詩

蜨飛山無人澗響若讀曲巖雲媚晴暉起弄海波綠  
諸峰殊陰晴嵐雨灑我轡亂泉路欲迷山鳥時飛導



入山凡幾曲緣澗凡幾灣山迴澗轉處海風赴襟寒  
回看來處峰伏地微露尖峽口雲行急撲面如輕烟  
側卧看羣巒起伏極有勢長天如匹絹潑綠恣游戲  
雲白山青青望可數百里我從山背來對境心數起  
山東曰朝陽山西曰夕陽夕陽只芳草朝陽松柏長

有馬雜詩

山街足樓閣姝麗多倚市借吾一榻風夢入谿聲裏  
松蘿風颯然雙泉自奔瀉踞石而科頭白衣山人也  
陰陽爲之炭不虧亦不盈已余幽憂疾始信泉有靈  
谿館無人至松杉闕翠微烏山底處似沈范二公祠

紅綠

山館基  
以烏山

谿聲使人靜鳥語引熟寐風從前山下盡帶松竹氣

筆工亡古法但於俗書宜龍蛇入吾手毛錐空爾爲有馬

虛筆  
長健

雷奮雨百倍雲馳峰四移山靈好才氣獻此一段奇  
搖兀竹籃閒怕雲下密幄銀竹萬叢鳴先生夢徐覺

夾竹桃

官齋六月花相映紅白尤憐夾竹桃政爾無言神自遠  
祇緣不俗韻殊高如山案牘圍長夏隔海烽煙照怒濤  
老子婆娑聊獨笑花前那得並兒曹

六月十八日未明望海

天荒荒而非雲月團團而無色海兀兀而不波樓迢迢  
而將白

九日與胡康安同登北極閣

雨霽秋高最蕭灑北城登臨俯原野海外歸來多感傷  
脈脈江山待來者胡子可人能醉我共看落日天邊寫  
吾儕未知所歸處復際中原動兵馬丈夫忘世乃大雅  
謀國區區策殊下道傍茅屋猶有人歲晚雞豚足同社

### 貧女

貧女低眉十六七茅屋西風怨斜日只將翠袖度荒寒  
未許鉛華汙天質向來衆女總憐渠性格矜高爲識書  
易得河清難一笑盛年不偶欲何如

### 覓屋住

事平廿餘載吳趨未忘亂會城向東北瓦礫嗟過半比  
年多官人大力規久遠捷足割墟落彈指鬪輪奐節署  
南屬河甲第已無算閭深不可測巷陌驚屢換壯哉試

屈指宦橐想鉅萬繫予懷此都久愧累親串三年歸自  
外蹤跡轉投散崎嶇持入口白下誰可館不憎市井喧  
聊喜淮流貫數椽待棲止頗類夔子竄迂狂人所笑慮  
此蓋熟爛自污亦無徒行歌南山矸

紀對南皮尚書語

尚書顧我言子適日本歸韓釁初未發蓄謀非一時彼  
族治戰具其端詎難覘國能反報備豫或不遲邊事  
壞至此語次張髯髭逡巡仰而對茲意匪所知頗聞列  
國法其制有三師號爲常備者終歲聽指撝晝警若赴  
敵宵嚴若交綏其次曰預備軍行乃登陴又次爲後備  
不足則徵之朝令夕已發有類脫兔馳中朝實久弛文  
武苟以嬉寇至紛募兵械器窳弗治近如牙山役浹月



遙相持濟師數十請主者莫肯尸敗我非彼能霸上真  
羣兒尚書試熟念下走徒獻歎

自督署步歸寓宅

幕府絕通謁散步惟長廊枇杷冬始花雨中送微香院  
落疎逢人向夕氣已蒼覓句悄隱几移燈清照牀竭來  
親吏牘勉強豈所長驟聞北方警寇深徒慨慷此邦敵  
久瞰狙襲誰得防論議多奚爲緩急未可量出門望我  
居南去五里強數日乃一歸兒女迎踉蹌坐定顧之歎  
老我當何鄉

哀東七

甲午十二月十一日殤於江甯才二歲

中年念兒女剛性殊曩昔眼中第三兒抱玩輒不釋咿  
啞裁學語見爺已解索吾懷雖鬱伊爲汝常慙適親黨

共誇慧比似珠的皪何時大疎忽不節使傷食投藥若  
小瘳日日看愈瘡出愁入亦愁彌月疾遂革冬至幸脫  
命小寒過不得父憐母復愛撫汝兩脚直

二

兒死膚未冰卧板藉以裸出門別吾友歸歛已不早入  
棺望始絕父子緣遽了猶當書兩和白骨知此惱紙錢  
送汝去遺燼那忍掃今宵我不寐窗下燈皎皎後房汝  
啼處絮泣剩婢媼一家各上牀擲汝向荒草歲盡冶城  
旁月寒新鬼小

三

三歲居日本此行誠不利海東得是兒自詫帶奇氣歸  
來太倉卒斷乳哺用餌十旬卒致殞分我感時淚遼瀋

方鑿兵暴骨滿關外誰非父母體驅向萬里棄汝殤何  
足恨浩劫行且至中原適無人去去非我世明年化猿  
鶴聊欲從此逝

移居綿俠營

以下乙未

惆悵梅邊想戰塵往來何地著吟身客懷漫比官爲業  
物望誰云國有人花發休論滄海事水清聊結草堂鄰

鄰吳氏  
草堂

東風草草勞人目又看江南二月春

西湖初泛

乍喜杭州入眼新便呼小艇載閒身抱城嵐影浮初日  
侵岸湖光上早春祇覺樓臺勝人物欲憑山水遠風塵  
酒壚正在宮牆外帶醉凭欄獨愴神

湖上

漠漠雲陰斂曉光平波纔欲倒垂楊諸峯盡在微濛裏  
今日西湖是淡粧

湖上雜詩

微雨灑復止春山人獨行西湖知不遠照眼小桃明  
湖心風乍起雲影暗雷峯但覺波光白不知煙翠濃  
湖波太嬌軟畫船殊難載最宜拏小艇盡領烟水態  
諸峯競弄影湖水與搖曳不用借樓臺爲渠作莊麗  
歡情酒維持好景詩記錄吳儂生湖山此語差不俗

樓前樓聯云好景盡將詩  
記錄歡情須用酒維持

名勝多難復風流不可攀蒼涼莫懷古祠廟滿吳山  
海氛傳聞惡閩浙防有變朝旨起尚書昨日湖上宴

二月二十八日邊  
制軍游西湖



二月向杭州何人見獨遊

余以公車北上辭張孝達制軍行至上海送程弟赴汴而

杭州獨游

猶能輕世事日日醉湖樓

春煖桃柳新六橋多士女只愁風雨來路長奈何許  
漸與諸峯熟又憐湖水妍湖山豈識我欲去莫流連

用賈島真山民三月晦日詩作首句

三月正當三十日挽春無計只傷春明朝惘惘成追憶  
却道春光屬別人

賈首句

九十風光能有幾春風春雨總經過誰知地變天荒意  
莫借魯陽迴日戈

真首

書程弟扇

我生實不辰降志而辱身如今好相戒莫作采薇人  
二兄久食貧被酒語跌宕門戶要人興兩弟齒俱壯

暮霞

祇疑日已落黯黯頽雲翳百里俄極明金銀耀天際  
雨氣漫不收斜照忽相逼愛此帶雨林臨流弄奇色  
同季直夜坐吳氏草堂

一聽秋堂雨知君病漸蘇欲論十年事庭樹已模糊  
怡舅卒於建甯聞耗述哀

考功攜伴愛烏山晚入京塵淚有斑寄畫虛傳書尾意  
填詞苦說夢中還已孤兼抱離羣恨別舅長懷被酒顏  
今日西州憑一慟幾生併在廿年閒

怡舅寫蘭寄  
諸俗却悔當年浪出山  
先考功於京師題句云早知氣味難  
以寄怡舅

晚登吳園小臺

衆喧不妨寂獨往偶成遊閱世人將老登臺月已秋蒲  
荷叢暮氣星宿沸清流何事單衣客悲歌起飯牛

遊石觀音寺登周處讀書臺

秋原風日照眼明北城熟遊思南城遙憐古寺媚平楚  
入門忽對幽崢嶸高臺望望悄然下雙梧蕭蕭嘯檐瓦  
勞生折節空爾爲太息當年讀書者

上海待鑑泉未至

南來過此意常違北望愁予已念歸感逝行吟空撫髀  
傷時被酒易沾衣遙山隱日成斜照弱羽衝風更退飛  
司馬青衫道傍客待君相對說知非

烟臺舟中

月照成山船似箭舷間一卒話軍前捕生虜謀渾如鬼

斬級健兒祇爲錢棄甲于思恩不死靈輪魂魄懟虛捐  
衆中驚起沉淪客憤慨終宵獨廢眠

天津入都車中

風雪晚可懼去京猶百里局促轅下駒潦倒車中士  
國勢決難挽將相豈足爲幸此無人知歲暮吾將歸  
六年復此來停車聊一望指點畿內山祇汝色無恙  
舉朝議變法不動猶拔山道傍窮措大縮手入袖閒

懷座主寶竹坡侍郎廷

滄海門生來一見侍郎顙頰掩柴扉休官竟以詩人老  
祈死應知國事非小節蹉跎公可惜同朝名德世多譏  
西山晚歲饒還往愁絕殘陽挂翠微

贈丁叔珩



吾嘗語忍盦知德誠已鮮奇才世豈絕平日故難辨交  
游雖甚盛往往致不滿所憂乏藻鑑妄意丈夫淺固當  
勤物色兼取狂與狷忍盦領吾語俄作風雨散堂堂入  
泉下懷此竟未展去國纔五年世事凡幾變匹夫亦何  
有盈抱但孤憤北行心久絕此舉良可哂更持溝壑身  
來看風輪轉九門詖蕩蕩驚鳥紛漸返故人那得見酸  
楚睚屢泣時賢如衆星殘夜見復隱芒寒而色正丁沈  
培子長照眼惟君秉貞剛愛國出誠懇聖明信所學

溫旨促編纂尚書

張公孝達

敬風采傳語戒肥遯名高心

益虛志猛氣殊穩吁嗟才實難諸子皆萬選自餘斗筭  
輩僂指何足算奈何吾所知遂亦世所罕回思往時語  
奢願付迂誕勸君益厲操期以振選慳勿云幸直尋枉

尺已深損中年見匪易  
暫聚意彌款相規吾分爾知君  
終不盡

追懷陳絨齋

與向

風味絨齋致最優  
眼中何處著時流  
逢場未減清狂概  
帶醉偏尋寂寞遊  
雙鬢早衰緣骨肉  
孤兒誰託指山邱  
輒塵丁鄭還相見  
宿草年年淚不收

贈王幼霞前輩

聽運

即題其憶遠圖冊

朝士衰風雅  
嶠老半塘封  
章函涕淚  
樂府積悲涼  
畫本秋心藁  
殘碑翠墨裝  
此中從遣日  
只禁說行藏

答沈子培比部見訪夜談之作

寒夜肯過我來者  
非等閒取我已逝懷  
今夕復見還始合  
若微感再厲遂無端  
嗟我豈有知感子  
難自吞長劍

四五動十指千萬彈持以喻我意此意殊未殫須墨惟  
灑血須紙惟剗肝執筆爲我書我舌敝猶存子心狂而  
忠子節純且堅爲子所能爲毋爲空詬天

二

世衰士益放未可榮以祿高言虞見罪聊復事飲啄君  
看我此來作計乃爾毒免爰逢百憂明夷入左腹毀車  
更殺馬降志非取辱起追孫登嘯坐視唐衢哭韓非懷  
孤憤終爲秦政戮東野變爲龍退之詎能逐

三

相知垂十年未覺往可悔中閒有逝者

謂王

可莊警痛愈相

愛吾儕各老大豈作兒女態形骸雖斲隔至味固不敗  
精誠遠相照山海了無礙神京萬斛塵風烈成晝晦驅

車犯埃壒憂子亦以憊國門行揖別歸聽長江碣見唐詩  
歲暮酷懷人孤吟復誰耐

十一月二十二日出京道中雜詩

長嘯出國門寒日黯相送大風主何祥不發軒轅夢  
殘月墜雄縣黃塵蔽任邱此中商避世猶恨近神州趙北口

雄雞奮悲歌驚埃勃馬首落星雖有心孤月空開口孟東野詩語

班班河閒車南歸罷擊鼓車中人自奇無取流俗怒  
客行自言苦風駕犯霜風誰見斯民困宵征逐馬通  
雪霽天欲明林巒混一色曉日忽上騰雲歸徂徠白  
守道去人遠諸峯空自青不緣文字力何處見英靈



騏驎駭駘服車上山石英雄時豈無熱淚空橫臆  
雪勢可以休雲容顯復晦千峯錦離離夕陽綸天外  
驅車楊柳店懷古空蹀躞不恨無羊公恨無郭太業  
四顧無一遇迷魂不可招千磨還百折心鐵可能銷  
尻輪極周流神馬善超越閉門枉造車何時出合轍  
犖确途焉窮心先疲馬至村落帶山明晚晴展人意  
忍寒不衣裘未老殊覺赧大哉馭人言勝於求飽煖  
中原虛無人唾手真可襲言愁我欲愁茫茫百端集  
蒼生我何有憂樂俱不聞欺人謝安石冷笑范希文  
伯埭安石既與人同樂不  
得不與人同憂見世說 揚州在何許帆影亂烟樹南風且莫競我欲過江去

泰安道中

隴上清晨得縱眸停車聊自釋幽憂亂峯出沒爭初日  
殘雪高低帶數州迴首會成沉陸歎收身行作入山謀  
渡河登岱增蕭瑟莫信時人說壯遊

歸至南京

朔風撼書窗苦雪壓斑竹道人晚歸來窗紅竹還綠

海藏樓詩卷第三

正月二日試筆

以下丙申

心遠無妨得地偏南歸袖手對吳天  
凌空翔隼高圓外破寂鳴雞午景前  
白下溪流向人靜紫金山色入春妍  
閑中把玩消何物却辦微吟遣壯年

從廣雅尚書登采石磯彭楊祠

大江東去意何如  
暫駐旌旗上碧虛  
祠廟雲霄依太白  
山川風物比南徐  
料量筋力艱虞際  
總攬英才感慨餘  
不信乖崖久閒地  
吳民遮看老尚書

蕪湖道署燕集上廣雅尚書

細雨于湖路揚舲節使過高齋  
春日晏江介晚來波宏濟時誰賴  
艱貞理不磨赭山樓甫落歎息話  
涪皤

袁爽秋

觀亭修諸山滴翠樓是山谷遺蹟

### 從廣雅尚書登石鐘山昭忠祠

江湖交流山壓城祠堂照影收江聲千瘡萬痍痛徐定  
惟見樓觀棲崢嶸已亂終疑闕人力三十餘年民尚瘠  
山縣荒荒僅一祠壁記含悲空入石刳後神州運漸開  
掾時須是異人來沉吟高閣天風晚落盡江梅長綠苔  
復從遊武昌西山九曲亭至陶桓公祠

楚山入武昌連峯到江盡危亭據九曲江樹遙可認東  
坡遷人耳名與此山峻壁閒潁濱記微歎轉清潤長沙  
擅功伐當日比廉藺平生慕聖禹事乃儒者近至今讀  
書處老桂散餘韻來遊生苦晚入世邁多覺誰言不逮  
古差喜陪雄俊尚書實挺生憂國帶霜髻高賓有梁蒯



聲實各隱磷峯頭立小語萬古入鴻陣部民爭擁看諸  
嶺爲微震賤儒世雖棄濟勝頗能奮登臨摩倦眼私淑  
竊自信被髮行歸山振衣向千仞

上巳吳園修禊

茫茫相對復江春奈此英多磊砢人各自中年憐意氣  
聊堪一醉被悲辛層陰坐滯芳菲節樂事偏歸寂寞濱  
未遣風流頓銷歇等閒乞與草堂鄰

題上元顧氏忠貞錄

忠節元天性尤悲不遇身從來依草莽何處有君臣浩  
刳灰俱燼貞閨志獨辛表微下廷議未足慰斯人  
著錄存家乘清門挺雋才友朋傾一世文筆助餘哀天  
道宜昌此人言豈妄哉君看明德後名字已如雷

三月三十日顧子朋招集薛廬

龍潭一片故依然坐客浮沈過十年能共送春中酒後  
可堪照影綠波前入山計就真忘世招隱詩成更問天  
素老顧生莫怵悵好留豪氣伴華顛

過侯府懷亡友陳幼蓮

東城巷陌年年異雙梧拏空最能記故人何往門庭是  
門外悲風入吾袂當年無日不相見晝語夜談樂難比  
憶嘗酒半去不告君自追我及水次仰天執手長太息  
過爾摧折非吾意子宜爲世善自愛是時被酒已微醉  
我居纔距一牛鳴強遣肩輿爲送致一日塘邊獨徙倚  
野鴨蔽天帶霜氣北來下輿當我前指看秋巒共稱快  
平生平生幾知己此情此情非夢寐蓋山顧五號能詩

寫我思君得深味

顧五子朋先有懷陳之作

題章价人太守銅官感舊圖

曾公靖港敗章侯救以免功名震一世雲泥隔歲晚歸  
舟近長沙父老話兵燹山邱易零落銅官長在眼作圖  
名感舊自記極微婉文襄耄年序奮筆亦殊健未如王  
翁歌壬秋放浪情無隱曾章今往矣意氣固同盡時髦  
論紛紛騰何事挾餘愠道高迹可卑子賢身不泯報恩賤  
者事豈以律責顯彼哉李子言徒示丈夫淺李元度序  
不言祿  
及之語

示大七

氣剛在不欺志遠在寡欲器閎在重已量大在愛物求  
名在務實益智在勤學隨波而逐流極貴亦為辱

五月連雨答子朋

雨晦風昏斷來往宿竹孤鳴映書幌壓瓦宵驚鍾阜移  
開門曉看河流廣寂寂樂城話對牀平生聽雨愛虛堂  
年來顧五空相念短髮青衫滯建康

雅星時亦在甯

六月三日大雨後詣局

短檐竟夕意難平侵曉藍輿繞水行日氣含雲迷遠岫  
風頭帶雨過高城謀乖舉國天方醉歲惡緣江眾易驚  
叵耐放晴終未定坐聞蛙黽滿城鳴

六月二十一日愚園集歐公生日

惟將清興慰蹉跎漸比名園閱事多銷暑一時尋水石  
移尊竟日對風荷醉翁去後誰吟怨傲吏閒來任嘯歌  
却笑飛卿未聞道放懷經世待如何



遊定林觀乾道題名

定林亦何有惟有石嵯嶢孤泉澗不駛灌莽圍巖腰殘  
寺久難興敗牆土猶焦俗僧贊佛力誑語空嘵嘵那知  
記名蹟盛述蛇與貓我懷臨川翁松岑寄寂寥穿雲復  
涉水獨往不可招高躅縱莫尋神理故非遙清詠入山  
骨歷刼元未銷空山一悵望悽愴心潛搖猗嗟此何世  
仰睇仍層霄題名從劍南終覺習氣饒光緒視乾道後  
來論宜昭相牽返城郭酷日愁山椒

晚涼

臨河初月挂幽光出樹雲陰吐晚涼飯後常教移竹榻  
秋來最愛住江鄉引身林水神俱適斂手風塵意已蒼  
心膽試捫盡灰冷幾分餘熱祇剛腸

章希援招集半隱草堂

主人結習在名場，酒熟秋高宴此堂。  
遠岫依檐窺客坐，涼波繞舍占鷗鄉。  
買山莫便嘲支遁，種漆還應學壽張。  
蓋頂把茅吾事辦，未須相對說行藏。

南皮制軍六十生日

獨起輝天際，尚書若啟明。  
深心逾少壯，浩氣貫生平。  
諸老唯無術，神州久見輕。  
如聞覘國者，反報爲司城。

二

神完中有恃，談笑却熊羆。  
自古雖聞此，於公始見之。  
个臣坐江漢，四海念須眉。  
吾道微如髮，還看振孔姬。

雜詩

秋風入庭戶，豆實自離離。  
寒來吾事就，霜露空爾爲。

柳下與少連尼山所不予誰堪於陵仲谿刻久自處  
鴟夷誠可人爲瓶乃非智奈何磊落士畢生事細碎  
舊邦閔姬漢孰爲挈才雄救僊丁文敝端居獨尚忠  
豎子終何成時哉無好手狂夫復登高臨江作重九

傅若生茂才歸自揚州餉菊十數盆

年少愛書兼好事傅生風趣果無雙秋來携得揚州句  
烏榜黃花獨渡江

十月向盡劉五聚卿貽晚菊數種

愛好休嗟晚微言欲辨韓

韓詩既晚何用好

能留孤興在正耐

此時看秋氣關人事霜叢耿歲寒劉郎應解意冷淡自成歡

濠堂落成

惜哉此江山與我俱不偶廿年去來迹知者有鍾阜作  
堂臨濠上終日對戶牖泊然疑可老豈屑問誰有聊忘  
孤生哀亦避世事醜吾言甯欺天有如堂下柳

子朋屬題山水小幅

江東顧五倦遊還占取城西水一灣卷卷清詩皆入畫  
底須俗筆汙溪山

二士風流比阮嵇年來物役苦難齊欲知白下閒蹤跡  
只向書堂覓舊題

子朋所居深柳讀書堂  
中余舊日題詩最多

歲暮

結茅在濠上歲暮一憑闌疊阜雲邊色虛堂雪後寒  
懷當世意端欠此心安建業城東水殷勤不厭看

雪後第一樓曉坐

以下丁酉



江波海氣曉澄鮮  
晞髮貪憑碧檻前  
天半飛樓收雪色  
坐中明鏡對雲煙  
鵝夷畫舸甯終隱  
梅福吳門未是仙  
儘有豪情凌百尺  
只愁無地與高眠

徐進齋觀察屬題李北海古詩十九首墨蹟

于將莫邪難爭鋒  
自言此書與盧鴻

北海自題云故由人盧浩然索書

來文選是家學  
父子授受善與邕

願為鳴鶴殊鴻鵠  
善本

鳴鶴俗本作鴻鵠

誰見香象追飛龍

書家云右軍如龍北海如象

世閒石刻

已希有朱闌麻紙垂奇蹤  
吾聞堯章論書法以行為真

非專工

姜白石續書譜云李邕西臺輩以行為真

孟堅復引狂為戒  
欹斜流

弊妨童蒙

趙子固書法鉤玄曰須戒北海之狂狂在欹斜流為元章父子

諦觀字裏極

駿逸超凡絕迹元難從  
道州鰥叟主端直  
獨至江夏終推崇平生頗疑古  
欺我顏柳以外皆瞍矇  
重姿重骨任

交詬千金寶秘歸徐公

宋人百牛圖

野水不成川遠山常隱樹爾牛適何來百態目與遇

貫道師巨然皆出董北苑汰哉擇石翁鑒定憑老眼

錢擇

石題為江貫道所作

長安黑色兒掛角讀有異何如多牛翁一生不識字  
短布單衣寒東門厲石斑非常猶不遇飯牛歌漫漫

豪堂

抱城水南流春來綠漸肥蔣山繞其北白雲相委蛇精  
藍割山光修竹何猗猗岸迴林稍密桃李能成蹊置堂  
於此間非瓦而茅茨據榻攬峰岫開窗弄漣漪堂前何  
所有魚鳥長忘機堂後何所有兒女從頑癡堂中何所

有夕陰與朝暉壁間復何有舊揭兼新詩人言此堂陋  
華廡宜纖兒或云此堂偏當路誰高栖自從堂之成使  
我壯志虧甯馨必匿笑焉知曠士懷

小廊

門掩餘寒綠盡生小廊淨掃稱閒行春陰庭角雲如墨  
窺出江梅半樹明

答沈子培

委靡謀何濟優游意自哀津梁愁作佛黨錮怕成魁海  
覆虛琴操池枯待劫灰不應子沈子圖霸尚憐才

處非恒度栗  
姚信霸才

海棠盛開與稚星似齋二弟同賦

曉日蠲寒霧乍開忽驚絕豔立蒼苔破顏自擅生天質

顧影難憑傾國媒  
脂水粉痕空寫照  
濃春好夢費疑猜  
贊皇花木曾成記  
忍道根從海外來

二

漫翻譜錄辨棠梨  
色色香香理不齊  
三月繁華渾醉後  
一春桃李總顏低  
牢愁銜子思鴻鵠  
勝事題詩步碧雞  
記取濠堂人未老  
花前吟到夕陽西

三

燕郊東出記尋芳  
流水游龍赴道場  
沈醉春風圍日氣  
斷紅人面擁花光  
髻年塵夢頻彈指  
宦況江城獨繞廊  
幾樹如雲俄似雪  
暗中誰信送堂堂

極樂寺海  
棠甲天下

四

關心風日凋顏色  
八九分開已惘然  
帶露微垂長脈脈



怯寒猶斂最娟娟朱欄玉砌休論命宿酒殘粧欲破禪  
心力平生殊不負櫻花詩後又三年

三月三十日

一雨海棠盡閑庭春已歸池蛙空閣閣梁燕自飛飛晚  
時不與蹉跎心有違鄰園猶可借聊探牡丹肥

幽栖

空翠曉網縕鳥聲清可聞目成溪上水心悅嶺頭雲下  
吏何妨隱幽栖誰與羣前灣異喧寂絃管太紛紛

寄呂秋樵臨城

中年養熟老難侵小邑纔堪託鼓琴莫道才雄無洩處  
太行萬疊付高吟

栖遲牢落總悠悠世事甯關我輩憂看到揚塵滄海後

也應不忍話前游

語笑當時是盛時張皇幽眇最能奇杜陵身世非今日  
却辦顏唐作繼之

題吳幹臣觀察邊城籌筆圖

吳已歿

會見侵邊警甯論距海憂南藩隳緬越左股折蠻甌羣  
醉誰先覺孤忠入九幽圖窮心不滅詩就涕應流

陳雨生孝廉屬賦其子婦殉節事

婉婉雙栖子俄成寡鵠哀戲言終不負烈意苦難回乳  
藥中宵覺離魂七日纔憑君續原鬼莫說望思臺

趨府

朝官酸黠飾文儒外官猾鄙矜走趨營營逐逐各自喜  
風氣所域無賢愚江南今日信仕國脚靴手板尤睢盱

嵯峨高牙坐開府轅門千步闔肩輿曉風霍霍日照旆  
排頭競進紛冠裾分廳塞坐交耳語飛箝巧謀咸有圖  
少年票姚逞眉睫羸老答颯拈髭須大臣欠伸日加午  
倏忽潰散隨僕奴洶洶一闕竟何取甯有智慮裨訐謨  
造物著吾百僚底飽看頗得言其羸爾曹亦自關世運  
吾屬爲虜深可吁

吳彬士笠竿圖

曾聞襲美語天隨漁者猶容世外才今日青衫襍蛙黽  
羨君漁具畫中來

上海旅舍二首

海置信無事滬瀆復多娛人意消歌舞江波動畫圖名  
浮真得損計左遂成迂誰見樓中客燈前坐欲枯

兀兀騰騰地聞歌稍覺悲孤懷時自振百折理何疑氣  
已隨年減才應與世衰龍蛇書累紙賴汝作雄奇

題晚翠軒詩

稱詩有高學云以澀爲貴子豈真可人所詣遽爾遽詩  
懷文字前未得殆難會即論句法秘大事匪狡獪初如  
咀橄欖枯中說滋味終乃啖枇杷甘平宜渴肺子詩實  
早就流宕可毋畏試迴刻意功一極才與思向來謬見  
推淺語不予贅仍當摹千文爲君題晚翠

題沈愛蒼正陽集

沈初少所作忽以二  
十餘日吟成二卷

所積亦已久誰能默不言探喉殊整暇出手見淵源軼  
事皆庭訓高才定宿根宣南朋好盡忍觸舊巢痕

題吳鑑泉新成水榭



舊隱新營意最殊曲廊小景向來無過橋山色閒相引  
隔水林風清可呼白下羈心長兒女草堂斷句徧江湖  
廿年攜手淮流上照影何人識故吾

贈某孝廉

某將居西湖讀內藏

仁義既灰死何時會復然有人慕聖任引爲己所患一  
朝欲捨去究彼不二門某甲業頗賤哀子壯且醅已矣  
幸少須胡爲浪跋跋

八月十四夜四馬路步月遂至江岸

窮年刻意獨何爲分付秋風爲一吹自欲登樓託疎放  
難從倚市論妍媸淞江幾曲潮皆滿好月連宵睡較遲  
可笑希文腸太熱強持酒淚作相思

題何眉生梅村歲寒圖

歲不我與寒始來何以娛君梅正開村中有君梅有主  
知君耐寒心似梅寒入枝頭春又入坐閱人間歲華急  
對梅無言三歎息梅不能言對以臆庾嶺歸來君未老  
十年村居惜懷抱雪中覓路影應孤月下扣門衣自縞  
相從滬瀆足清歡世外吾儕儘往還誦我詩中元有畫  
朱霞白鶴滿空山

自題三十八歲小照

萬事慚強聒公中年偏寡歡養精勤閉目留待老來  
看

吾年垂四十頗亦厭虛辭結習渾難盡鳴秋略有詩

九日五層樓登高

市樓便是登高地我輩方隨行路人一醉不辭中酒病

九秋還鬪百年身書來兄弟顏俱瘦愁裏江山事更新  
紅紫打圍須未老可能摩眼向風塵

西合興夜飲

老大侵尋至逢場底足誇菩提心不起粉黛眼終花英  
氣殊爲害風情每自嗟尊前思暮雨誰爲鼓琵琶

虹口

江流貫虹口來往獨忽忽海月橫空澹霜天帶晚紅蟲  
沙期共化骨肉事安窮誰判平生意銷沈向此中

十一月廿八日書事

俄人據旅順

蓬萊左股已遭箝渤海東門枉戒嚴燕雀處堂元自若  
豕蛇荐食更無厭侏儒坐遣衣冠盡姬漢行看玉石炎  
眼底橫流兼落日故山何處認茅檐

南皮尚書急召入鄂雪中過蕪湖

絕海浮江短景催浪花雪片鬪清哀衝寒不覺衣裘薄  
爲帶憂時熱淚來

舟過金陵鍾山戴雪而卧凝眺有感

依依鍾阜舊崔嵬負雪尤憐玉一堆詞客還從江上過  
濠堂端付夢中來蹉跎知遇存黃土寥落朋儕隔酒杯  
曾是華年磨滅地不關兒女漫興哀

海藏樓試筆

以下戊戌

滄海橫流事可傷陸沈何地得深藏廿年詩卷收江水  
一角危樓待夕陽牕下孔賓思遜世洛中仲道感升堂  
陳編關係知無幾他日誰堪比辨亡

時校定經世文續編

張玄



河南張處虛禮辟不可致涼州軍將行被褐忽一至邊  
章乃小醜豈足煩至計中官久無道海內鬱怨氣來朝  
平樂觀祖道空府寺車騎握六師出言誰敢異鳴金召  
軍正酒半一揮觶以次誅有罪餘黨悉拘繫摧山迴日  
月事若反掌易天地可再造忠正各在位何爲不出此  
震懾頓失次豎子狃常情輕語固傷智悠悠魯陽山翩  
然從此逝

郗超

丈夫倜然如繫囚自斷猶堪歸隱邱人間郗超不再得  
縱有高隱誰復收當時戴公剡中宅精整乃與官舍侔  
辦資百萬意奇絕未用夷跼窮推求咄哉傳約隱不果  
慎勿輕詆渠非優從來酸寒痼山水焉取名節驕王侯

士人麕願衣食足鬼神靳汝甯相酬嘉賓可作吾可隱  
買山豈畏譏巢由

叔衡來滬療疾相見泣然因有斯贈

孤生微意本難明氣類凋傷更自驚滄海相逢君又病  
春寒向晚月初傾拂衣世網甘除籍抉目城門敢厭兵  
地下王陳應共笑空將鬼錄數同庚

叔衡言可莊獨宸皆以四十五  
歲卒吾今年亦四十五矣

三月十一日獨游龍華看桃花

龍華三月春風寺游騎續紛盡日多窳堵百尋標古岸  
絳雲十里壓晴波枝頭照眼餘寒在物外牽腸向晚過  
總道綠陰容易換憑君何處卻愁魔

上海旅次酬顧五子朋

顧選得荆溪學官

當時豈意眼中人逆旅相看老漸親  
蘇子終成寄陽羨荀卿猶自客春申  
溪山緣在官甯腐風雨愁來酒未醺  
他日尋思定何味祇應餘味是艱辛

雜感

積傷不成哀放眼閱衆死短長雖幾希  
頗復悟意理三十四閒正似重圍裏  
被創兼飲血枕藉動相倚脫身老牖下  
殆出神鬼使疲形墮堅念冲想駐馳晷  
謬云中

有得寸鐵恐難恃

忍盦才甚銳志業如伯符獨恨情稍急  
鬼伯疑相驅赴名何乃猛短局誰能紓  
養子豫章材明堂容爾須回思平生意  
攬轡姑可徐

堂堂陳水曹充碩好腰腹十年談笑徒  
宿草何處哭聞

其寢疾時羸瘠喪肌肉若云死歸真入夢恐不識躁恚  
終自戕內熱一何酷肛軀竟難持瞥眼入鬼錄豈徒惜

君耳張季語殊毒

幼蓮耳甚長季直聞其病危曰吾惜其耳

秣陵有胡尉狂簡吾所取健犢走復來自謂可長久昨  
聞已暴卒驚淚迸遠友寡營素深許於我意尤厚云何  
邁山折不得見耆耆悠悠或難繼心氣散莫守豈如汪  
廣文老溺色與酒長生欺人語乘興儻不朽

題張季直荷鋤小照

蚤歲矜狂各愛名中年積憤欠忘情終憐流俗譏評淺  
自覺文章得失輕萬頃吳江容獨秀一垞扶海足躬耕  
殘宵我亦成孤月正要先生作啟明

暮寒

四月二十七日感事



宮中

二聖自稱歡滄海歸人感暮寒旅力既憊時

竟失風波垂定事尤難是非坐共微言絕恢復終憑老

眼看料得淚痕潛漬筆卅年密記在金鑾

韓偓有金鑾  
密記五卷

風雨過

樓中獨夷猶坐閱千帆過向夕風掀天何人歌楚些

天公辦一雨巧與吾意合倚柱復哀吟風霆殷相答

愚園小飲罷復過張園

微醉取酒意倚樓聊共斟風情屬初月涼思在高林荷

氣清宜晚車聲遠未沉魯連將玉貌不去定何心

六月十八日風起

河干天已曙深巷月猶明殘夢愁中斷孤蟬風外清向

來堅自擲欲去惜終輕此意何人會躊躇獨倚楹

赴鄂過九江

終日江聲裏憑闌入楚鄉暮雲百重合夜雨十分涼赤  
縣憂空切吳船夢較長平生匡山興天外想蒼蒼

泊舟九江城外

放懷經世竟何如幕府休騰北闕書惆悵潯陽泊舟處  
江風鷺面對匡廬

六月廿八夜半舟下大通聞江岸雞聲口占二  
絕

江中聞雞鳴音響極抗烈坐念祖豫州要爲天下傑  
此去謁吾

主驚人須一鳴難忘晉公語霜鬢爲論兵

七月初三日雨時將入都

倚樓看雨有今日坐憶宵來鬱熱時待與官家區畫了  
秋風鱸膾是歸期

又一首

秋蚊不可見惟覺毒在膚向夕一雨過翛然得我軀莞  
簟生嫩涼衾幃初可俱時節改人意蹉跎衰壯夫

渡海

積鐵黯然流駕霆與之騁時有片雲飛茫茫帶孤影  
視海爲吾地方能守此州可憐志士淚空作接天流余  
語舟中人曰此水非海乃豪傑之淚耳

星辰在其上波濤在其下碧落浩冥冥海心玩秋夜七  
夕黑水泮夜起

七歲渡此水往來三十年誰言人未老處處是桑田

七月初十日入永定門

雙闕空嵯峨積塵霾楚囚天橋望落日徙倚將誰儔華  
屋豈不存視之如山邱吾今實桃梗嘗與土偶遊

### 新館

新館雙松裁似人宵來雷雨長精神十年不踏春城土

賸與寒廳作主賓

庚寅後不應春試乙未及今再入都皆以秋來

三載江湖百不堪病槐相見轉鬢鬢欲知閱世安心法  
須向空庭老宿參

七月二十日

召對紀恩

皇帝破資格不忽一士微何來江南丞是日登丹墀曉  
色麗禁闥流光度采恩內官肅前導屏氣當簾帷大哉



本朝法獨對無所疑榻前咫尺地君臣義在茲

天容何清聳堯顙高嶷嶷咨汝宜盡言愀然聞累欬於  
時實忘身長跼紛陳辭臣聞立國本有備乃不危積弱  
非一朝無兵決難支願言示所急舉國知所歸以我億  
兆人潰此千萬圍致死而後生其端自毫釐士夫躬爲  
倡事實不可遲禍來倖丘山甫去皆燕嬉初無憂患情  
何從振其衰所陳第一義舍是非臣知忠憤見聲色封  
章出諸懷

上意爲之動引手受所齎再拜奉身退踟躕獨含悽耿  
耿宮燭光搖搖在心脾

九日虎坊橋新館獨坐偶成

前一日乞假得允

九日宣南晝閉門幽花相對更無言殘秋去國人如醉

晚照橫窗雀自喧坐覺宮廷成怨府仍愁江海有羈魂  
孤臣淚眼摩還暗爭忍登高望 帝閭

十三夜對月

秋月遂如此詩人胡不歸閨愁將細字旅況待寒衣一  
顧當途淺方知所徇微循廊千百轉底處可忘機

泊九江

葉葉風帆疊疊山涼波浩渺暮雲斑愁人何許腸堪斷  
只在殘陽欲墜間

漢口得嚴又陵書卻寄

江漢湯湯首重迴北書函淚溼初開憂天已分身將壓  
感逝還期骨易灰闕下驚魂飄落日車中殘夢帶奔雷  
吾儕未死才難盡歌哭行看老更哀

聞胡琴有觸

好春閒過卻傷春花月江山迹易陳一念十年銷未得  
畫樓銀燭坐懷人

坐懷連用

等閒未解惜流光草草鶯花過眼忙縱使風情渾不減  
中年引鏡已迴腸

游漢陽古琴臺

小山障江帶城陴官道繞出湖一涯岡巒黃落荷芰死  
展此百頃涵空倚古臺在斯實微阜牙琴久絕音已希  
我來撫膺坐還嘅小憩聊敵疲與饑物生能事蓋殊趣  
如魚自潛鳥自飛眼前山水誰賞得况乃意象窮淵微  
百年人已竟孰重奚取辛苦求中期汪銘

答甫

宋歌

芷灣

騁文字兵火所隔餘殘辭游人三五豈懷昔競愛亭榭

娛斜暉呼舟撇波絕湖去迴望延伫含清悲

題海昌陳氏蕉桐滌硯圖

中有錢香樹題詩

昔日揚州守流傳滌硯圖功名循吏傳風采列仙儒  
浙水徵文獻乾嘉盛士夫不辭題卷末端似太平無

十二月赴鄂舟中閱天演論

照影吳波熟栖栖歲又殘雪呈山萬態風策日孤寒  
楊墨途甯合人天理未安莫持逝川旨添淚入迴瀾

除夕

在漢口

留楚逋臣黯不言入江漢水夜逾喧今宵安得通宵夢

夢過松江向故園

時兄弟在閩而妻孥寄滬

志業區區漫愴神行年四十老相親梅亭松柏風吹醒

猶是中宵飲泣人

福州西門梅亭先考妣墓在焉



海藏樓詩卷第四

人日雨中以下巳亥

人日梅花空滿枝閒愁細雨總如絲臨江官閣晝欲暝  
隔岸楚山陰更宜逋客偶來能自放翔鷗已下又何之  
憑闌可奈傷春目不似江湖獨往時

正月十六日梁星海約游琴臺

倦看江漢接天流從子高歌醉一邱梅雪欲銷猶點酒  
湖波乍暝已勝舟琴因感遇聲終歌士有傷春淚不收  
堅約蹉跎更稟興中年存歿試迴頭

廣雅尚書招同姚園探梅

看徧官梅愛野梅自麾騶從踏莓苔入春風色連林覺  
過雨山園一半開賞會未妨饒勝事憂勤終是靳深杯

尋花士女成圍處競指元戎小隊回

偶占視石遺同年

一世詩中豪用意常在小永叔故可人舉頭驚飛鳥南

皮舉介甫語爲問余答之

臨川不易到宛陵何可追憑君嘲老醜終覺愛花枝石

遺示詩云著花老樹初無幾試聽從容長醜枝

詩要字字作裕之辭甚堅年來如有得意興任當先

田舍計最高本自輕元德徑上大牀眠陳登翻作客石

嘗渡江過余就下牀卧竟夕故戲之王荆公  
有詩云無人語與劉玄德問舍求田計最高

江樓雜作

高閣下臨江獨居無與語坐看春水生十日鳴江雨  
甘苦難喻人何爲著談藝相知定吾文未可望後世

平生江湖思中年去住心孤帆向空盡暮靄帶山沉  
去日總如夢浮生徒自勞樓頭夜深客闇坐聽江濤

梁星海山長招陪廣雅尚書兩湖書院看桃花  
斲石治廣除納湖以爲囿長廊行欲盡橋影帶高雷迴  
看何冥冥柳浪覆千甃緋桃閒深淺繁麗如展繡頽頽  
頽始怒誕意縱未透離離弄妍日爛爛燒春晝雄堂中  
勸學海內鬱奔轅九流百家貫一破萬古陋賓師得烈  
士懸鏞待衆扣主人扶僮至最愛循牆走髻絲映花枝  
頗似飯顚瘦相將開水閣遠思發醅酎拍波起羣鳧遮  
眼拖孤岫微言引深感世議安叢詬樹人同樹木時事  
猶可救十年才輩出行與木俱茂從公且婆娑河清人  
自壽

續雜詩

橫風驅奔雲漏日射驚浪出沒雲濤中江鷗意殊壯  
桃花映朝日豔冶光四射嫣然雙海棠垂紅倚簾罈  
門外大江橫翻覺詩難好吟就武昌花寄與南皮老

買花二首

朱顏棄我去繁花爲誰妍春來當自惜莫惜買花錢  
身老心尚孩才衰語猶綺未可破沉迷一生端賴此

洪山登南皮尚書閱兵臺

跨城山勢各依依遙愛浮圖插翠微桑麥欲成春半過  
江湖長繞客安歸其亡隱痛南公語可去曾聞穆氏幾  
莫倚高臺看落日論兵殘淚向誰揮余去歲在都

召對乾清宮極言練兵之急



示女景兒垂二首

受女名景德微字學我讀書音酷似景汝來前父教爾  
莫信鬼神信道理莫愛豪華愛義禮容人之過稱人之  
善居心仁厚百福始非徒言之在踐履景能行此吾愈  
喜

垂也年十三勤學氣頗高男兒胸中寬要作萬人豪敬  
賢閔不肖愛物隨所遭寡欲自超然富貴真鴻毛汝父  
學孟軻救時心徒勞疇能繼我志所願在爾曹

對牡丹作

牡丹花已發日日入歡場香重渾成醉春酣欲化光朝  
霞生近坐寶帳出嚴粧山甫多才思縱橫未可當

三月十二日作

人生三十爲一世失卻少年安可悔朱顏銷盡四十來  
昔日風情竟何在功名自是誤人物敗德喪真作吾害  
不妨小待老堪憎付與世閒償宿債平生心得祇乘興  
百折千磨終不壞文字緣深豈易拋色塵意起殊難戒  
江山滿前花競發性不能飲亦已醉向來不信說天公  
後世知音應有采

漢口春盡日北望有懷

牽懷何意意猶疑楚水銷魂似別離往事夢空春去後  
高樓天遠恨來時袖閒縮手人將老地下埋憂計已遲  
莫道一生無際遇靈脩瘦損記風儀

送荆宜施道俞君實解官歸養

去官信爲樂見親方是歸焉能視日月荏苒辭庭闈俞

公仁甚勇所學在不欺拂衣誰得止神助非人爲萬眾  
惜其去臨岐惟一揮奪得塵中身還爲邾下兒我心懷  
寸忠自放漢水湄爲忠不如孝嗟公遂其私虞山有國  
老顛顚想霜髭未可聞此語憑公寄我思

廣雅尚書生日以詩爲壽

莫道希文窮塞主却教矍鑠敵清貧垂天斗柄諸方見  
入海江流半壁振憂患老來身自扞須髯白盡氣逾新  
閒鷗不爲詩翁戀浩蕩煙波恐未馴

偶題

臨水知身老驚秋覺世移道人餘習氣花落戀空枝  
畏暑久廢吟初涼頗思酒檻外足風濤秋江落吾手

八月六日攜炳垂二子登晴川閣

危磯赴水作尋顏二水縈回見帶環檻外千帆皆入閣  
城中萬戶總依山廿年藍縷規殊遠一老經營事已艱  
恨殺江流偏到海端令憂患滿人閒

八月十九日曉起

夢中猶自感勞形落月穿樓戶未扃欲遣秋懷供一睡  
隔江鼓角喚人醒

按視黃陂工次丁牧

國楨諸倅

以泰

相送至澠口

藍輿輕駛勢如飛百里秋原樹影微雲外木蘭何處是  
卻將晚雨送人歸

木蘭山名在黃陂北鄉

丁子賢聲滿三楚諸君偉抱有成書

以泰有上趙侍郎論兵事書

看

渠恰是功名士何日中原共掃除

八月廿七日挈孥渡江居武昌大潮街湖舍



扁舟載兒女何處是吾家楚客愁千斛江天秋一涯地  
偏聊可避計拙未爲差枯樹門前倚沈吟待暮鴉

又

世人良自淺非爾獨能深老意趨枯淡孤蹤近鬱沈方  
成隔江望一縱倚樓心對面誰相識栖栖未易尋

九日風雨中子培自揚州來見示新作

重九不能出江天風雨霾故人吟楚調秋氣滿高齋離  
合十年所交親百事乖莫言堪放浪可念是形骸

九月十五夜月下作三首

霧起江旋隱雲橫月自華何人念秋柳疏影尚天斜  
沈寥氣未清空水自交明樓外無所見煙中聞鶴聲  
涼影白紛紛空中行一鏡下有獨吟人不隨萬籟定

過眼二首 九月二十日作

過眼誰知果與因物華易換我難春風懷收拾應將盡  
只作花前悵惘人

萬恨千愁總爲貧休論墜溷與飄茵江頭蓬鬢扁舟去  
留取秋波一段顰

呈栗兄 十月十三夜月下作

秋風吹客武昌城夏口新霜著木顚楚月初升依薄霧  
江流乍落動寒聲平生幽興端難遏投老名場暗自驚  
憂患如山容一罇聊憑佳釀醉阿兄

廣雅留飯談詩

半生作詩多苦語一見尚書便自許彌天詩學幾詩才  
五百年閒闕標舉寢唐饋宋各有取挹杜拍韓定誰主

忽移天地入秋聲欲罷宮商行徵羽

初日照廊霜後暖爛漫秋花階前滿抱冰堂上坐人豪  
對酒論詩暫蕭散世難如山未易開袖中短筆太清哀  
黃圖赤縣看公在乞取江湖放浪才

聞江建霞京卿卒於蘇州感賦二首

西北空憂倚蓋傾傷心諸子共時名先登已作行閒氣  
定論終推牖下榮箸述蚤成酬短景風流頓盡薄餘生  
蘭膏煎後天年夭一歎吾徒意未平

二

詔書夕下震朝端江鄭同登世所看不出固應全首領  
獨存真欲裂衣冠龍顏日角縈魂夢玉宇瓊樓警歲  
寒極目茫茫天又闊淚河莫爲助波瀾

孝感道中

山蹊斜繞澗村市暗通橋紅樹春常在沙河雪不消

信陽雙林寺

雙林左院黃梅樹雨浥寒花脈脈開莫爲幽香歎岑寂  
道人曾此小徘徊

李家寨輿中

牕懸柳林月衣帶信陽酒不見何景明孤吟振林藪

題道旁孤魂祠

山重水複野縈迴雲翳風昏晝不開路出荒祠須一哭  
迷魂自好莫歸來

答沈子培見訪湖舍不遇

我生安歸指菰蘆美此積水來寄居循灣常記一枯樹



到門猶隔千畦蔬子知吾居第幾湖枉用相存命肩輿  
輿中萬態入詩眼助子吟思清而姝尋常叩門客有幾  
自謂敝老真吾徒如何乘興適相左此段堪畫誰能圖  
街西道人微有鬚湖壩居士暫且癯武昌城中悄來往  
孤絕頗似雙浮屠市人或指訝二子何許流落形垂枯  
豈知閱世意皆倦握手中千欸欹斜街諸鄰不可呼  
存歿聚散痕欲無當時癡腸那復熱賸有世議窮揶揄  
明年計君決北何與我整合終當疏涪翁有語會記取  
一面全應勝百書

閱報

檻外江濤風動天梅酣閣煖又經年長愁可復知閑味  
不飲那堪近酒邊閱報終朝成抵几收身上策只求田

善夫老去空摹杜雪涕何從拜杜鵑

上稱疾罷元日朝賀並停筵宴

### 紅梅

歲闌人意苦難春春入枝頭最動人已借風霜成爛漫  
那教桃杏比精神簷前索笑寒侵手樓角尋詩雪滿身  
欲識吳姬須秉燭搖紅影裏定誰真

### 二

濃香竟日繞房櫳絕愛橫斜幾簇紅疎幹自生畫本外  
真花宜著鏡屏中春回小閣詩初就暖入朱脣笛未終  
卻恐先開還易落從渠帶醉倚霜風

### 三

冷落詩人瘦不辭風懷銷盡費維持斷橋流水相逢地

絕代朱顏一笑時夢到江南花豔豔書來鄉國樹垂垂  
眼明正覺吳粧好莫爲微顏訝玉肌

四

一段幽光初破冷數枝奇色已含胎正教雪重終難壓  
猛覺春酣只半開酒醒乍驚翠羽墜詞成便換小紅回  
誰憐省識東皇後耿耿丹心獨未灰

春寒

以下庚子

繞銷岸雪轉江風便覺春寒意不同澹澹輕雲隨薄日  
微微遠岫出遙空孤懷喧寂元無著世變新陳各自工  
物外但教容七尺莫將目力送歸鴻

定林訪碑圖爲徐積餘題

丙申六月  
余亦同遊

題名巖腹墨猶濡惘惘相看入畫圖一段煙雲成故事

十年江漢老今吾鍾山遊侶蹤誰繼乾道詩人世已無  
賸就徐郎求搨本霜松雪竹共模糊

營盟鷗榭既成以詩落之

畸人雖無心戲具未遽擲蓋頭茅一把取足甯吾魄去  
江不十步矮屋久欹側我來披使正意外忽有獲取山  
置南窗決天入東壁白鷗果來下欲與我爭席拊楹一  
長歎頸失向來窄是時蟾將圓百里漾皓色中宵風何  
怒驚浪拂檐白暄涼理相召此變固已劇超然獨燕處  
熟視忘語默玩物未可非喪志乃一適

丁叔衡畫便面見貽以詩答之

形骸本死器神識來寄居持此遊人間如體著衣襦少  
壯實美服意氣豪且麤老病服漸弊瑟縮情不愉夫何



久喪我從渠作榮枯一朝得自識奮迅不受拘於世定  
奚缺所憾良區區恒齋雖病廢神完能自娛作詩遠寄  
我巧兼畫與書我謂子無病非病乃其逋平生意相親  
重子甯以軀子誦此詩終霍然還壯夫

夜起

林杪春江月上時樓中清影久參差四更欲盡五更轉  
猶有幽人戀夜遲

寂寂

寂寂春歸小閣中牡丹半已委殘紅傷春枉是傷懷抱  
自起推窗倚暮空

盟鷗榭偶占

風從金口來入我盟鷗榭欲尋半日閒卧看斜陽下

海虞楊詩四  
九  
四月十一夜步江岸

樓臺月下皆飛動江漢風前自激揚可惜無人共奇夜  
輕寒著袂倚茫茫

送子培北上

南來誰信北歸難分手相看鼻屢酸天外驚疑沈帝里  
江頭顛顚病郎官餘生家國終多負當日名流略已殘  
去去吾儕須忍淚盈眶猶熱莫輕彈

泊舟澠口觀湘鄂援軍北行

湖波淼淼欲漂山淺阜醺湖辨綠灣初日漸依帆影出  
曉風乍拂蓼枝還漁村銷夏歲江汭驛路連雲貫楚關  
可念湘鄉諸子弟只憑身手入兵間

里婦哭其溺子聞而有觸

窮母傷兒不欲生滄波白日隔幽明一哀出涕真何謂  
避取回頭忍淚聲

夜起江樓口占

太白明北風作江中飛浪高入樓不似羈人懷抱惡

八月十一夜雷雨

高樓洞開秋始涼沈沈夜定風穿廊幽人獨卧意殊適  
江聲入夢含蒼茫驚回雲氣忽逼帳雷奔電激還繞牀  
喧闐久之亦已寂意氣空盛終銷亡殘燈未滅蟲蝠沸  
競此短夜爭微光

感憤詩四首

羣昏自稱豪一奮碎神器罪魁有三士不在徐剛輩榮  
光首拒戰咋舌敵已怪聶馬久枝梧彼族嘖強對朝中

輕諸子謂虜不足畏何虞果掩至很復得狼狽脫令津  
沽閒海城早爲帥微聞金鼓震萬衆已奔潰牽羊必肉  
袒所全詎百倍京師安如山完取十萬械吾言匪詭誕  
嚼血聊自快

瘠狗無不噬弊木無不標重黎卒死難勁節殊皎皎許  
子盜所憎要領安得保異哉立聯徐駢首豈同道哀許  
吾傷之決去胡不蚤何人與渝雪未可恃蒼昊  
京城知必陷所苦吾

主耳黑衣縛袴褶無異逃李子當時設有人奉

上匿鄉里逡巡稍南趨北嚮下

詔旨遂興燕齊甲自

翦畿輔匪諸蕃孰不從稅政悉可理徒手援天下甯用  
折一矢吁嗟失此會秦晉入井底



死或不蔽辜論罪當以榜東衡等徐崇纔可謂漏網吾  
嘉宣化守擊剛奮忠讜奈何褒海城此李反見枉天步  
方艱難是非在刑賞可令天下士西望徒怏怏

盟鷗榭雨夜獨坐

江聲定奇絕氣涌如排山忍寒吹燈坐得意風濤閒  
風江已自豪妙雜秋雨響次寥不可名閉目試一往

九月初四日護妹四十生日栗兄置酒作詩胥  
及棹弟皆作一律寄之

長兄置酒菊花黃阿妹歸來共一觴物外年華纔四十  
眼前風景是重陽思親何處尋京國問我還應話武昌  
知否倚樓人漸老江風吹鴈不成行

登大別

風頭過水欲生波江漢登臨意若何  
變態憑誰閒領畧  
晴川閣外雨雲多

渡江觀武建軍合操

妄人輕召兵敗績坐不教十年未可復  
士氣太凋耗此  
軍何所用身手好年少誰能結以恩  
湯火豈難蹈悽傷  
就步伐悲憤入騰趨庶幾哀者徒免  
爲敵人笑尚書氣  
不餒勅略被將校胡爲致詩客戎幕  
議增竈何當出短  
歌傳誦徧營哨居然懷國恥收取毛  
錐效角聲尚盈耳  
旗影山椒繞水落舟更遲橫江憐  
晚照

傷壽伯第仲第

三年伏處絕艱辛赴死終傷志未伸  
四海朋交俱失望  
一門兄弟自成仁高林奮筆傾酸淚  
張卓函書帶戰塵

莫怪褒忠殊不及朝衣東市是何人

伯弟自成或後深自齟匿京師陷兄弟皆仰藥嘯  
桐琴南弼余芝南與予書皆以賜卹不及爲恨

陳叔伊次子聲漸歿於天津之亂叔伊自爲哀

辭使余題其後

神京烽火莽連雲愛子書來隔虜氛  
魂夢飛揚多幻想道途驚絕入傳聞  
栖栖江漢詩人老去去家山落日醺  
賸有哀情似熙甫一篇思子綴奇文

十一月二十七日雪中作

楚山盡作曉雲橫驚浪偏含急雪聲  
潑墨江天如薄暮凝寒樓閣轉虛明  
釣蓬斂岸行蹤杳凍羽喧枝墜影輕  
不是微之倦乘興恐將干謁損詩情

是日欲詣  
廣雅不果

十二月十六夜月下作

歲盡寒殊苦  
晴明得此宵  
月將冰共照  
雲似雪難消  
樓影清如畫  
江光靜更搖  
誰憐庭下柏  
相對不成凋

江漢

凍苔漸活到梅根  
暖日搖波出岸痕  
客裏春光生悵望  
鷗邊山色易黃昏  
欽崎已覺人堪笑  
強聒終嫌舌尚存  
江漢思歸歸未得  
腐儒何必屬乾坤

輓何梅孫

以下辛丑

一生相見只三年  
後有千秋付杳然  
吾黨已孤胡見奪  
海濱欲老更無緣  
卷懷獨覺天民貴  
講學還憐士氣堅  
遺墨數行題歲盡  
可堪追答向重泉

除夕得手書有東海老農之約

江寬舟中作

赴海江何急  
西行我自還  
中流分列郡  
小立過千山  
激



浪雷長繞穿煙鳥獨閒三年南楚滯暫去亦開顏

金口至青山隄閘告成賀廣雅尚書

天迴地轉事不同鄂州行爲天下衝勢如奔虵脊先起  
誰欺見者抱冰翁見之非難謀豈易一世沈沈在夢寐  
下手驚看國手棋殺意未呈機已備登山支頤久端相  
城東渺渺連湖光決湖捍江出平陸何時事成衆方覺  
金口桃花青山柳百里驅車一回首湖水入江更不回  
膽落江神避髯叟十年前後試商量北燕南粵歸吾堂  
要令土與金同價那得高原可種桑用淵明語

三月十二日作

懷才不自勝兒戲引一粲及此未老閒餘春勤把玩  
志欲俟河清歲月稍見奪吳越有具區興發不可遏

薛烈婦彭氏哀辭

才美年何促情深義不生爲殘身亦累同穴意殊明父  
執多名士哀辭遍郡城佳兒與佳婦誰忍看銘旌

四月二十日夜起

坐覺樓前江水深江風收雨動高林半規涼月通宵色  
一枕勞生向曉心故里欲歸真自調幽憂爲疾獨難禁  
好懷不惜銷沈盡那向人閒罪陸沈

杜陵畫像

杜陵一生百不就至死不爲天所祐誰知歷劫行人閒  
造物安能如汝壽詩者一人之私言或配經史垂乾坤  
丈夫不朽當自致假手功名何足論

寄王又點

王於庚子五月自天津脫歸以詞寄余

哀音通世變詞客似嘯鵑去亂聊全已知微莫問天誰  
言登樓賦得並望山篇我亦沙鷗侶江湖不計年

述哀

榕城疫盛行人鬼爭出歿里中喪族弟俄復奪一姪姪  
年已及壯蹉跎未授室愆期我負爾兄嫂老彌鬱於時  
迫端午次兄方卧疾書中道無慮悲悻常忽忽何來鵝  
車礮一擊碎心骨父子相繼逝先後纔旬日

二

我持栗兄書猝不知所爲自呼神略定勃然湧千哀兄  
書本細秀兩紙字纍纍二喪仗經紀智慮饒安排疾疫  
甚刀兵一言傷我懷江船幸未發飛書還相催行閒別  
無語速去勿遲迴我兄但自脫婦稚徐更裁

三

淦子赴弟喪炳子之日本我特促之行所慮良在遠炳  
前跽告辭酸淚爲一沍方當迎而父但去毋悽斷爲農  
堪養親世變莫挂眼三年學成就聚首日靡短東人況  
善我受託頗繾綣而父書云云望汝意不淺

四

乞假居持服懸懷在長兄張沈來自吳入門偕吾樗  
忽相弔慰語次心屢驚初聞兄又卒無淚眼空瞪究窮  
死所由號叫肝自崩陳郎書在手白日非幽冥行年已  
六十兒輩盈階庭何苦而輕死自沈爲獨醒因憶神戶  
歸失足落東溟墮河經再厄胥種終相迎我欲叱閻羅  
鬼籍除其名不然當把臂地下從先靈

張季直沈子培  
也陳謂筱元妹



丈

五

兄亡非緣疫其故獨何歟畏疾而馮河哀哉豈此愚寄  
書且視妹所言固不虛書詞靡贅亂巷陌多繞紆河之  
水悠悠城東得遺軀終時作何狀割愛從黿魚爲弟誠  
無狀不能摻其祛兩兄挈一姪何許相睢盱知死不可  
讓以次當及余

六

死喪雖甚威後死方有事門中二十口舍我將誰寄致  
書使亟來惡瘴猶爲厲漢陽趣賃屋規以安汝輩三棺  
當暫厝閒歲待我至解衣斲蒼山和土將血淚築成名  
恨塚償我無窮意炳乎汝勿歸父死叔尚在東行吾計

定世亂重抱來

七

稚辛聞此變千里來共哭四支已半摧一手倚一足作  
書寄護妹天地此骨肉事牽難久留送汝使我獨登舟  
一悽惶去去意殊酷樓頭卧更起船尾燈猶綠江波闇  
漲天風雨欲揭屋餘生付殘世何地同啜粥

聞呂秋樵卒於開州

早從吳下羨風情晚落幽燕重老成玩世坐令奇氣盡  
救貧卻怪長官清同遊餘味關懷抱分手微言隔死生  
親見倉皇西狩日恨君無命待還京

護妹痛兄而殞作訣妹辭

如欲有云不知何言中心冥頑孰爲辛酸我有女弟曰

嬪于陳孝恭無閒族姻歸仁天禍吾門兩兄繼捐子不  
勝喪從之九原嗟我與子名爲弟舅少小相依長而遂  
分此分非他子亡我存各有恨淚流爲黃泉往者萬古  
來者億年爾我甚疏倏忽其間手足奚親萍梗奚緣我  
尋子形恍若夢殘兀然驚疑匪醉而顛嗟我與子名爲  
弟舅曾謂弟舅不如路人子爲枯骸我爲游魂從此長  
絕理無復全

七月廿三夜

勞生吾尚在骨肉幾人存殘夜自風月高樓入夢魂楚  
山俱不寐江水復何言懷抱從來惡雞聲莫更喧

漢陽視嫂姪等

入門忍淚獨徬徨人事難追恨更長誰遣中年判存殁

翻成逆旅對孤孀魯山巷口秋風碧裏水城頭晚照涼  
回首梯雲雲斷處連宵歸夢墮蒼茫

梯雲里宅  
今且空矣

鷗榭聽濤

武昌城東山簇簇夏口無山藏萬屋大江挾漢俱北行  
照我窗前山影綠江雲忽起失峯巒推窗惟有波如山  
看江莫若看風雨長日驚雷繞坐閒

乍寒

九月二十夜微雪

卷卻秋江付白雲荷闌暮色漸難分今宵小閣寒如許  
贏得濤聲徹夜聞

林社

為杭守林公啟作

蒼天不可贖此老亦已葬區區身後名未足塞衆望杭  
人悲太守作社寄湖上千秋姓林者山水擅佳藏平生



不隨波意氣一何壯於何見顏色隔岸聳秋嶂文章易  
朽耳在口即行狀爲我問孤山年來誰絕唱

漢口月望夜送易實甫

悵望瀟湘晚詩人獨去秦行看秋葉盡歸及月華新舊  
隱思廬阜微辭見庾塵眉閒尚精悍誰信得閑身

月

月是釣愁鉤鉤來無數愁月愁有密約相見五更頭

十一月十四日北風欲雪登樓作

木落雲荒短景催江號樓迴暮空哀北風吹客忽已晚  
壯歲辭人殊不回兀兀只成天共醉茫茫始信世無才  
三年魏闕休迴首極目嵯峨是債臺

日本岡幸七郎示其師楠本天逸事畧且求作

詩即用楠本原韻

學問不一端要以仁爲歸在野抱忠孝安仁殆庶幾天  
逸論知行精詣今所稀子陵與雲卿終古誰能譏閱世  
卧巖壑浩然老不衰吾觀鳳鳴學有當非玉卮

其事畧曰楠本名孚嘉肥前國針尾島人其講學處  
名鳳鳴書院年三十餘辭大學博士歸隱自比嚴子  
陵蘇雲卿其學以大學中庸爲主嘗曰大學是性學  
之書主知故自格致入中庸是心學之書主行故自  
戒懼入今年七十矣

題林迪臣孤山補梅圖

穿塚仍依處士墳栽梅人去有餘芬年年春到孤山麓  
幾樹梅花屬使君

端午橋中丞屬題秦權拓本

開皇穿地證量器隗狀或作林者非甸齋尚書出所得  
始信黃門不吾欺四鈞爲石云極數先後二詔具刻辭  
辭意精嚴書亦稱典重氣欲無鼎彝吾聞先王歲稽器  
量衡律度殊等差地官司市禁僞飾不中不粥市乃譏  
政行四方實賴此季末雜亂風益衰前隋後宋慕復古  
懸式俄弛誰能持今觀此鑄審且謹明壹別白除歉疑  
軌物垂則聖有作坊民正俗禮所宜儒生論秦輕詬病  
亭林對此使我增歔歔尚書憂時進狂狷必採隅說容  
瑕疵會稽刻石彼猶取崑山可作真吾師

卷之四  
詩  
四

一



海藏樓詩卷第五

登黃鶴樓

以下壬寅

黃鵠依然對逝波，倚欄千古一蹉跎。  
滄江勢爲高樓曲，楚客愁因落日多。  
武漢上游自形勝，官胡遺廟偶經過。  
書生枉負登臨眼，奈此東南半壁何。

野鶴

被服從來士不完，三年去國此衣冠。  
蒼鷹豈免饑爲用，野鶴何緣頂自丹。  
榮惑太微殊未退，橫流滄海故難安。  
等閑鹿幘休相逼，只作桃椎委地看。

送高子益應晉帥之辟并憶歉農夢旦

今日猶相見，殊勝別後想。  
執手天茫茫，覆杯人惘惘。  
我懷本太孤，賴子時見廣。  
平生言不盡，積意深萬丈。  
西北

雲自飛江漢波已長盟鷗誰共倚沈思成獨往

二

歎農躬篤行而獨稱我狂狂而有不爲吾道殊未光之  
子嘗有語聞之激我腸相知縱滿世幽隱誰見詳願言  
從子遊楚越空相望孤絃不成曲寄聲獨彷徨

三

放懷誠有味誰能爲人計吾嘗奇夢旦天資抱經世所  
學必適用束髮有宏誓知子果東遊志業一何銳嬾雲  
久不起坐閱滄波逝無用亦自珍真人喻天際

四

三高如麟鳳子益尤有爲流俗不能撼何曾背時宜德  
星出太原可辟魅與魍晉帥甚愛民毋乃天相之善國

來取法行爲王者師脫能盡其才豈異得一夔

渡江會議商約歸得上海書

人間閑氣漫相關觸熱扁舟倦往還楚澤混茫方入夏  
暮雲嶺嶂忽連山當歌暗覺憂傷魄顧影難憑術駐顏  
海內相哀能幾輩殷勤緘札賴雲鬟

杭州南高峯煙靄洞東坡嘗遊處也寺僧刻巖  
石爲財神湯蟄仙斥之易刻坡像杭人遂題  
之曰蘇龕蟄仙以書報余且屬作詩

湖山多勝處名蹟誰能辨南峯公再遊清濁遂一換凜  
然執議力巖石亦革面奎宿招以來錢神俄自竄逐貧  
與送窮揚韓弄其翰今君亦有逐二子當驚惋平生吾  
東坡異代獨眷眷敢懷爭墩意易此執鞭願他年身將

隱姓名應已變洞口掃花人安知即風漢

中秋苦熱述事

古稱愚黔首亦曰毒天下此策今不用科舉宜可罷陶  
公論未竟已遭肉食罵毆之僥倖途風俗焉得化矧茲  
災流行秋暑酷於夏萬人在狴犴僵仆相枕藉疫來猶  
防之何故反見迂區區鼠且腐豈足鵠雛嚇更莫嘲陳  
生逃威入鷗榭陶子方制軍疏言欲興學堂必先廢科  
舉八月十二日黃陂陳士可畏熱見  
過秋燕竟日遂  
不入二場也

八月十六夜月下作

林杪江聲競入樓樓前孤月迥凌秋一年又覺涼風起  
萬里空憐楚水流稍厭高談從捫蝨莫教幽興負盟鷗  
勝情勝具猶然在便合煙波縱釣舟



輓丁叔珩二首

無術移常熟虛聞罪合肥詞臣私激烈國事苦乖違議  
禮書終上論兵士稍歸雖云謀不用正色自崔巍

二

病廢卒難起平生意遂沉函書驅左腕興學折深心伯  
道天何在翁卿政可尋死灰爲君滅鬱鬱涕盈襟

淹留

九月初二夜作時漢水盛漲

漢水奪江流蕭蕭風日秋波紋晨蕩壁雁陣晚遮樓人  
遠難防意天高枉寄愁沉思欲何得所得祇淹留

歸思

十一月初六夜鍾山書院中作

頻年鬱雄氣避世路塵中委質成遺佚投荒得固窮石  
城寒翦雪官舍晚塵風歸思殊難遏何堪溷乃公

金陵感事

十一月初九日

海泣江愁殊草草楚叟聯翩乞娛老養兵成賊二十年  
半壁東南看摧倒南流湘水北流淮蕭孃呂姥真駑駘  
家居正落纖兒手逋客空興庾信哀

相帥有號姑娘者故以蕭呂爲喻

正月廿七日夜雨竟夕不寐明日遂去漢口以

下癸卯

緣盡亦無夢勞人意未窮蹉跎五年所輾轉一宵中欲  
老來殘世安歸此寓公燈昏江漸白楚雨莫翻空

蘇松太道袁海觀求題小像

精悍見眉間堂堂報國顏清吟須少谷雅望屬君山密  
邇猶常隔栖遲却未聞卷中幸相對小緩莫催還

陳弢庵過談

三月初六日在高昌廟製遺局作庚寅在閩相見別十餘年矣

螺洲石鼓鬱蒼蒼并作蒼顏歲月長一代風裁供小隱  
十年憂患謝歡場端看不朽功名外永憶相從几杖傍  
欲抱遺書歸墓側待君着筆敘存亡

先考功詞嘗乞  
毀庵作序未就

贈郭秋屏

有敘

右贈外務部法文繙譯官郭君家驥余交郭君十年  
服其剛介不苟亞於薩君鎮冰若使得位必可移當  
世蘧條戚施夸毗之習爲此詩以待知言者固不恤  
下士之怒也

華人無貴賤禱張喜爲幻此技欲何施反遭彼族嫚吾  
友雖多賢剛者亦罕見南薩與北郭二子我所憚秋屏  
實勁特骨立膚不曼濁河方滔天伏濟清自貫驕胡不  
敢輕安用賴舌戰大官習蘭闥詔敵必笑面此詔彼益

驕吁嗟誰好漢

海籌舟中贈薩君鎮冰

五月十三日

填胸山萬仞俗塵不能汙世人雖競憎久之情自露彼  
曹無所守披靡甯足數願君如烈日光彩破積霧平生  
畏若人剛耿天所賦追趨終不及正坐溺世故軍中有  
韓范敵國亦驚顧一夫重九鼎大事真可付誰能盡其  
才毋使歎遲暮

過烏蠻灘入伏波廟

鬱水經此灘談者各動色一川中奔瀉兩岫旁巖劣役  
夫良易恫憑險取血食地偏罕名字附會到新息是翁  
晚自哀氣盡貳與側平生少游語老去何可得廟前綠  
榕覆廟後寒泉泐陰美誠有功味冽類有德息陰且辨



味誰與訴胸臆

七月甲午師次橫州

西來飽聽鬱江聲看到山平水亦平  
論世始知異形勝因材誰可共功名  
炎風含毒秋前厲嶺月懸愁夢外明  
會有雲霓償衆望先聲應已動邊城

過橫州海棠橋即秦太虛爲祝生題詞處

醉鄉只在橫州地難得詞流此往還  
不道秦郎名解事猶將廣大比人間

名韞利鎖信堪哀黨禁人間久不開  
揮汗讀書太癡絕未妨竟爲海棠來

連城軍中作

夢中有蒼山壓鬢復欹顏舉頭乃非夢  
含笑羅煙鬟

舍生有同感病卒苦思歸聊欲率爾曹潰彼煩惱圍  
我如巫支祁鐵索沈古井萬牛慎莫挽熟寐欲猛省  
一筇超人羣蟲鳥伴來去秋山樹漸紅是我登臨處  
舐糠遂及米南勢欲北埽有忌或未能老羆卧當道人  
鐵路抵鎮南關  
氣吞龍州之氣

夜讀

亂山截殘陽黯然復終夕不廢我嘯歌聲猶出金石

二十夜待月二首

峰明月未上流碧滿庭除空山獨吟人百蟲來和余  
夜色不可畫畫之以殘月幽人偶一見復隨清景沒

與易實甫觀察同遊玉洞

入洞如登塔空明面面穿牀敷且容與花木亦蒼然斜

日飛臨海荒山走控邊吾儕能小立留取話龍編

十一月廿九日率左旂兩營移駐龍州

羣山破散縱雙流蕩蕩平原入戍樓試遣勞人歌一曲  
倚闌斜日看龍州

龍州雜詩

以下甲辰

一旅當邊鎖中朝意甚輕疲氓殊未活強對況難櫻坐  
見前車覆甯論卧榻爭官家方省事付與老書生

蘇詩  
堪笑

錢塘十萬石官  
家付與老書生

送禪弟赴泥

中年家國兩傷殘世變端留爾我看桂海能來蒐志乘  
龍州聊得共春寒樓堪北望登偏怯溪縱雙流合豈難  
牧馬九封二至龍州合流自顧決非窮塞主江湖好爲辨漁竿

題新闢梅廳二窗

平生縱眼殊有力，超海穿山隨所擊。  
目光注射遂無堅，何物相遮笑牆壁。  
去年連城千萬峯，潰圍爲我皆辟易。  
龍州蕩蕩勢稍平，倚遍危樓終不適。  
西廳雙窗聊一放，百里雲烟收咫尺。  
祇今邊帥用詩人，端遣書生來岸幘。  
欲憑秀句洗瘴癘，復恃豐年拋劍戟。  
種梅幽事春後情，養鴨閒塘雨餘碧。  
沈吟遠意當語誰的，的飛鴻黯將夕。

回首

五月十三日

雲影山光正吐吞，坐聞疎雨過西軒。  
池荷葉大香殊遠，梁燕雛成語更喧。  
經世寸心空自許，尋春殘夢那無痕。  
濠堂鷗榭行吟地，回首何人念斷魂。

柳州兵變

五月初十夜事



左江無安流柳慶久糜爛匪梳兵如篋用人實不善奏  
報多斬獲肅清謂已近豈知禍未艾復致柳州叛潰卒  
趨東泉中渡守亦散或云陷雒容桂林殊可患大臣頓  
失措滿局子俱亂邊軍纔五千遂欲調其半兩月僅能  
達甯足禦奔竄藩籬羌自撤何以弭外憂非予執不可  
隱憂誰得見治絲而棼之抵几爲一歎

枕上

六月初十夜

迷魂飄蕩觸雞鳴枕上驚回已四更往恨新愁紛入夢  
雨聲蟲語驟難明才華負汝休論命憂患磨人轉畏名  
百倍近來情緒惡欲從底處換無情

用蔡松年詞意

七月初一日作

胸次誰言瘴不腓瘦狂猶自勝癡肥匆匆年少愁中過

惘惘春風夢裏歸  
邕管投荒寄邊鎖  
京華懷舊檢塵衣  
石湖高韻殊難及  
漫葺叢編擬去非

閱宋進士周去非所撰嶺外代答

### 龍州七夕

蟲聲如雨上高樓  
雲自橫空月自流  
邊地星河還對酒  
勞生情感不宜秋  
靈仙所恨牽何事  
塵世端憐失自由  
祇有無窮兒女意  
青天碧海共悠悠

余去年與人書有曰以詩人而爲邊帥俗子或疑邊帥之貴余乃解之

高樓先生耽苦吟  
廿年來往江之潯  
何曾夢見煙瘴地  
蠻荒一落顏爲黔  
連城三月脫鬼手  
龍州還對山欹欽  
邊關形如馬振鬣  
戍卒狀似猿投林  
風情收拾付隔世  
坐覺老大來相侵  
豈無春花與秋月  
路絕不到詩人心

終年望饌數不至欲和乞食誰知音此人此地甯足愛  
廟堂用意殊難尋天高非高海非深平生詩人豈不貴  
何以卑我空傷今

和陶乞食

邊鎖付與誰主人幾忘之孤軍帶飢色欲去不得辭奉  
食逢黔敖天幸聞嗟來車薪火已然何從借一杯相視  
作隱語無暇更敦詩政府諉疆吏疆吏謝不才時事豈  
可爲伊成胡自貽

抱鄰

抱鄰南荒老不才祇應鄰敵化疑猜雲裏緘札今俱絕

海內何人更見哀

余舊有詩云海內相哀能  
幾輩殷勤緘札賴雲裏

八月初十夜即事

雨過氣通霽夜涼雲自流明明一天月颯颯四山秋林  
影紛當戶難聲靜入樓曲廊聯坐地莫說是龍州

述軒轅彌明語

知者談何易就之姑有云莫疑吾所學聊與子同羣孰  
意卒無取於時誰復分道人今閉口不語豈當聞

勞人

樓閣明清夜星河掛暮秋月低蕉影大露下角聲適邊  
事將誰語勞人失自謀平生江海思坐覺負扁舟

九日小連城登高

峯羅四野翠成堆溪繞邊州去又回雲樹蒼蒼收百里  
洞天鬱鬱起孤臺登臨始覺清秋入懷抱端須濁酒開  
玉洞連城隔年事可堪還此共徘徊



循行龍州城垣遂入同風書院訪仙巖登可思  
亭九月十六日也

築城於今二十年我來登之秋凜然山圍溪抱藏萬戶  
西南水聲長潄潄北郊蕩蕩爲平原稍廣可容千騎盤  
東城里許得精舍仙巖奇巧如倒懸摩崖題名紀萬曆  
新亭秀聳嵌其巔亭名可思思底事戎首海城留此言  
李秉衡倚欄縱目何所見惟有飛鳥投窮邊光緒十一年始築此城

梅廳

沈沈戎幕罷傳杯喚起秋風酒後哀憤世途窮得蠻府  
耽吟人老豈邊才閒情巫峽雲何在往事吳淞水不回  
可奈梅廳燈似月宵來策杖一徘徊

雜詩

雄鳩自佻巧了知非我曹名韉利鎖中何從見人豪

檻熊有猛姿嗟汝負其膽不如子母猿相依殊可感

畜熊一  
張二

年光如逝水流落付一歎卷中有崔徽緘封不能看

哀吟更誰和俯見孤影兀我已專溪山從遊惟片月

聞文芸閣同年以八月二十四日卒於萍鄉感

賦

公車回首齊名日黨禁寒心被錮年共道滂膺關世變  
豈知華管雜時賢功名氣盡薦肩外詞賦魂銷鵬臆前  
誰向不周山上望吞聲帝座獨流天

十月十七日奏辭督辦邊防

我雖敦詩書何嘗習爲將事急適無人馬羣偶一杖瓜

時當受代豈免懷怏怏登樓發長嘯遮眼憎疊嶂豪堂  
與鷗榭恍惚夢欲忘上書亟自劾不恤天下謗方將投  
江湖物外肆豪放獨來還獨往意氣詎非壯寸心照人  
間皎若月初上頽波既難挽用舍貴有當安能事纖兒  
東縛作恒狀

十九日又作

辭官聊自慰心魂譫語還憐世議喧憤憤甯馨難了事  
斷斷賈豎枉爭言中朝不省籌邊策志士空慙食祿恩  
抵掌談兵有人在故山容我閉柴門

哀猿

母猿中寒死活汝苦無方其子抱母首見之斷人腸世  
間有情物忽然異存亡生者何以生視天空茫茫

霜夜

酒薄纔堪助斷魂  
燈清猶自伴微溫  
窗前天共邊愁闊  
莫傍星河望故園

月下作

照眼溪山夜色新  
不辭風露溼衣巾  
千秋冷落龍州月  
暫遣高樓作主人

十一月十三日浮橋落成紀事

繞州長聽浪淙淙  
一日橋成接要衝  
布陳試馳飲江馬  
傾城來看卧波龍  
不愁野渡生春水  
最愛中流數晚峰  
怪底垂虹頻入夢  
連宵歸思酒邊濃

兩兄將葬

十一月十六日作

臨穴淪前誓餘生  
負九原窮山旋斂  
骨瘡海獨銷魂世



短猶相失神傷亦僅存棄官如見許終擬展松根

對梅作十一月二十日

手種梅花傍曲廊蠻風瘴雨損年芳乍看蕊大含春思  
漸覺枝繁帶曉霜驀地聞香魂欲返惘然自醉意猶狂  
閒愁閒想渾拋卻一段淒清亦斷腸

排悶二首

意起不能制觸目生煩冤遇物皆可憎心火方自焚軍  
書雖旁午戰勝恃一勤負手恣行散霜日冬更暄悵然  
對梅花落此半畝園邂逅緣不淺來慰羈旅魂妙香忽  
相襲會心即微言與君交已久寂寞幸見存終當掃塵  
債從子江上村

有懷誰與陳有恨誰與訴肝腸深可惜坐受塵土汙清

輝發遙夜皓月已徐吐長天漸空闊相見真成故哀我  
落世間沈沈抱幽素古今不相接萬感入遲暮迴光射  
吾膽滌骨倒秋露翛然委形骸何異迷者悟

戚元敬

南塘守薊門上疏論邊事七害與六失極之以四弊所  
言誠曉暢執政可其議築臺二千里財用亦已費號令  
既嚴明器械尤犀利不恃彼不來恃我實有備在鎮十  
六年虜騎莫敢至當時遣大臣三歲一閱視督撫不掣  
肘諸將受節制烏虜誰之功江陵方在位

再紀戚南塘語

臣官爲創設諸將所不顧視之如綴疣安從得展布

古人

古人不朽處端在歷困窮精光難磨滅厄極乃愈充在  
彼實不幸後世稱其工我緣溺文辭每思躡高蹤異哉  
非人情易地恐靡同中年寄邊鎖鬱鬱常填胸謂渠如  
我今意態必甚雄何爲苦求去志在菰蘆叢丈夫惜自  
貶安能伍狂童好收斗牛氣却吐滄江虹

伏波廟

龍州紀畧有八景謂之古塞遺祠

水挾雙溪急山蟠百越多祠堂空徙倚松竹任婆婆別  
欲營高閣何須附伏波一州推絕景來看墜金鐸

龍州歲暮

宿業堆山落極邊風懷逝水送中年登樓悵望忽至此  
擊柱悲歌休問天世短意多誰會者昨非今是自超然  
如何一片功名興不及江湖在眼前

蘇詩宿業  
獨臨邊

世已亂身將老長歌當哭莫知我哀以下乙巳

駐顏却老竟無方被髮纓冠亦太狂歸死未甘同泯泯  
言愁始欲對茫茫孤雲萬族身安託落日扁舟世可忘  
從此湖山換兵柄肯教部曲識蘄王

顛齋海棠

才因老盡更誰知只借花枝寄所思好夢夢回餘倩影  
春愁愁絕減豐肌冬郎昨夜關心雨子美平生欠汝詩  
却向龍州栽幾樹他年題句待元之

久戍

亂平嗟戍久歲稔覺民馴好整戎常避無功衆轉親後  
人思憤憤儒者意申申謝病真能去休論過與仁

家人行後偶作破悶



高歌入戶悵伶仃兒女離情已慣經三載邊愁元自老  
一場春夢又須醒閒廳書帙仍堆几小院花枝故繞櫺  
軍吏從容任關白不教頻掣閣前鈴

四月十七夜登樓作

龍州夜雨歇百里惟蟲聲樓高風自遠月上野逾平今  
夕邊城客無令歸思盈

四月廿二日晨起

拔木破山風到處翻江倒海雨來時平生未盡飛騰意  
祇有虛簷鐵馬知

子嗟

四月三十日雨中作

丈夫行藏不自主坐使兒女悲別離心知世事決難挽  
拂衣當去何遲遲龍州北望山參差雙溪合流來貫之

一雨三日溪愈馳扁舟散髮赴所期君可去矣今其時  
神色懔懔行水湄溪山笑人留何爲彼留子嗟何人斯  
嗟非吾徒謂我誰

題孟莚孫新著廣西邊事旁記

龍江波似箭一夕下邕州稍轉蒼梧棹遂乘南海流行  
歌具區藪歸隱海藏樓欲問來南錄名山屬孟侯

偶作

解兵如息陰去官即飛舉歸山養須髯猿公是吾侶

又一首

一落南荒忽至今滿腔幽恨獨沈吟亂山圍繞真何益  
難阻龍江北去心

答孟莚孫見贈二詩

希儀事在廣右錄滕峽亂詳炎徽篇今代毗陵有孟子

欲追田氏軼荆川唐順之有廣右戰功錄一卷記沈希儀平蠻事田汝成有炎徽紀聞十

四篇記王守仁大藤峽田州諸役二書皆爲世所推重能忘新舊學不俗一泯窮

通骨已仙老我無文身可隱看君旁記日流傳

戲示孟統孫

盤珠香水競新聲錦繡雲霞繞座生誰似風流孟夫子

阿蘭一曲獨移情

顧曲周郎老護軍龍州歌管漫紛紛祇應木石心腸在

除却巫山不道雲

七夕

簫鼓門前動四鄰空堦獨坐數星辰世間無限閒思想

不著龍州月下人是夕門外演劇

河漢微雲空復情長天涼月不勝清一圍夜色無人見  
數朶白蓮暗處明

雙星迢迢復皎皎寄愁無方指蒼昊等閒離合不足云  
所恨多情人易老

初十夜

歸思還隨秋月盈秋風已復到邊城隔河歌舞應通夕  
坐聽空園蛤蚱鳴

追紀六月廿八夜燈戲

軍樂泱泱正激揚眾賓同醉萬年觴燈光盡作魚龍氣  
角戲仍施虎豹裝螭螭橫宵驚吐彩櫓槍拂地忽摧芒  
主人親挾胡姬出試問何如雲鞞孃

懷歸篇

七月十六日作



士人坐爲仕宦牽出疆載質可笑人畢生號呼冒憂患  
苦用志業戕天真十年養氣如磨劍正欲一斬世事纏  
玉人雕斲豈受教服膺孟氏在此言荷戈戍邊非所學  
事急無人謬使前來時斗米值千錢今日郊原聞管絃  
舉頭秋月三回圓知我懷歸心勃然欲去則去誰能援  
黃鵠身微亦摩天回看帝座黯孤懸江湖攬袂空汎瀾  
微月

蕉竹

殘霞紅滿天微月澹不耀豈知人定後耿耿方相照  
梅廳廊下蕉與竹風雨時來嘯哀玉他年萬一憶龍州  
不待夢中應在目

武建軍資念塔歌

武建孤軍戍南荒邊亂雖平士多亡亡者入地塔出世  
含哀鬱怒凌蒼茫龍州西山日欲落雙江奔流動城郭  
倚天神劍忽飛來雪脊霜鋒見稜鏢夾岸遙看人共指  
俯映浮橋斷江水瘡痍瘴癘意全消孤標只在斜陽裏  
君不見男兒爲國軀可捐伏波遺廟尚巋然銅柱沈埋  
無覓處州名猶自喚文淵

報言粵東加抽賭餉感賦

盜賊非天性紛紛皆博徒孰能止游惰自足靖萑苻飲  
酖有切喻攘雞甯後圖如何理財者猶稅牧猪奴

述意

弔死扶傷二載餘堅持不殺竟何如懸知胡越同舟誼  
遠勝孫吳相斫書長策猶須教耕戰窮邊可使闕儲胥

誰人錯訝經營意規復南交計尚疎

將去邊防雜述

歷落歎歎極可哀暫投魑魅却須回棄官入海非難事  
曾欠蛾眉一諾來

老我何心看歌舞病來亦復廢杯觴爲君誦取船山

張問

詞語已避名場避酒場

龍州同僚公餞余以病不至答宋實甫廣文二首

萬馬奔騰駐足時淺人紛紛豈得知譽之不喜毀不怒  
半背眼光卿勿疑

題龍州小學堂

守邊有上策興學以平亂三歎登斯堂彌天待童冠

九月八日

竹影妙於晝夜窗看景幽燈清猶助月蟲老亦吟秋樂

上將奚適窮邊未解憂三年負重九知我有高樓

九日不出

登高亦何為謂可舒抑鬱今朝雖重陽抱郭獨不出此  
州乃井底無處見天日縱齊萬山巔猶在千丈巖三秋  
不易過業滿當自脫滔滔海揚波吾意行一豁

又

九秋佳節去堂堂無酒無花意欲狂但使棄官仍濟勝  
登高何日不重陽

黃花歲歲傲西風漢上江南舊寓公誰見戍樓人欲老  
夕陽來對拒霜紅

十二月初一日梅亭展墓

風淒日澹叩松扃如背人間到杳冥踈雨過山應助淚



斷魂依樹欲忘形生兒何益原頭土入世還憑地下靈  
徒倚沈吟終一去亂峯旋爲鎖梅亭

二

雙墳纔距一牛鳴中道相捐痛兩兄歸里何堪成獨客  
棄官已不逮同生依依山色供沾袂惘惘湖光伴入城  
賸向酒杯尋斷夢夢痕和恨欠分明

十二月初九日渡海

屯雲連島嶼漏日射波濤不覺天風勁空憐海水寒乞  
歸翻遠逝稱老得游觀鳥獸同羣者移情可是難

二

殉道乘桴外收身把釣邊波濤真隔世煙霧欲迷天一  
粟甯輕重千帆孰後先麻姑無恙在呼取謠桑田

三

海與風俱碎天爲水所吞重圍從盪決萬象各崩奔白日俄無色羣山僅自存窗間數高浪奇絕度黃昏

除夕

樓中梅影橫枝處歲暮燈前縮手人已辦春寒風帶雨重聞吳語夢成塵拋殘心力猶堪惜留取身名定孰親回首三年舊風味清狂減盡祇傷神

海藏樓詩卷第六

元旦試筆

以下兩午

勝天由素定吾意稍施行歸老方耽學投荒久厭兵一  
聞春風至復有少年情祇恐清樽側迴腸醉不成

贈嚴復

楞嚴雖妙絕筆授賴房融譯者論能事儒林屬鉅公東  
坡端可信幾道始稱雄西土應傳寫傾心更向東

首四句  
叙坡語

移情

試探平生囊底智卻來滄海覓移情風濤世外才難盡  
雪月尊前醉易成乘興豈知千里遠棄官纔信一身輕  
芙蓉城是游仙地作主何須讓曼卿

送檀弟之日本

東鄰新有功列國所注視取法誠不遠奮袂我欲起科目雖云廢孰解捐故技反令躁進者奔突如狂豕岑公今大臣亦肯遣二子聞當厠華胄此意吾不喜爲學貴平等要自勤苦始天子之元子古與庶民齒總角已矜夸長計恐非是諸兒尚遊學散漫缺根柢我躬實不閑遑恤我後矣子行爲勸諭稍令識義理風波晚吞天把舵幸少俟

二

弟兄各垂老歲月吾甚愛離別勿輕言晚景行自悔及今除豪氣世故或相貸攘臂正有人豈必需我輩吾歸子旋去迫促劇負債歡意直萬金賤售素所戒子行吾獨處閉戶且種菜得歸甯亟歸風雨牀可對



嚴幾道屬題江亭餞別圖林琴南所寫

小車何委蛇到眼數諸寺江亭阻蒹葭往復久乃至拾  
級出市塵長廊淨掃地開窗覓西山澹澹略含翠或行  
或倚坐語默雜嗟喟此間酒常薄感愴兼飲淚諸賢送  
嚴子各有傷時意林子序且圖下筆帶遠思嚴書滿天  
下身世尚相棄吾儕懷不平扼腕定誰冀軟紅襟上痕  
檢點若夢寐悵然書與嚴絕口向世事

哀熊季連

親見彌天戢一棺爲君奪氣久決瀾共推齒壯心尤壯  
無奈春殘病亦殘抵死不甘瓜歎鼻遺書真借紙剗肝  
豐城儘有衝天氣再得斯人可是難

哭顧五子朋

自意死窮邊不復能見子歸來誰與歸得我子所喜南  
行暫展墓海上聊徙倚一歡謂可必何用書累紙豈知  
有茲事捨我遽爲鬼投袂欲相追失望對逝水眼前盡  
成夢萬世不我俟

二

平生老縱酒惟我能切諫頻年跡稍疎念子不及亂頗  
聞態如故俗士望而憚傷哉卒坐此一醉渙其汗盍山  
孤可哀潭水深自恨畸人去不返題壁誰來看

三

持論絕不同意氣極相得每見不能去歡笑輒竟夕西  
州門前路爾我留形跡相送至數里獨返猶惻惻小橋  
分手處驢背斜陽色千秋萬歲後於此滯魂魄爲君詩

常好世論實不易夢中還殘錦才盡空自惜

四

稱疾因解兵用世志已灰尚思得佳傳非君孰能爲君  
雖避衰世浩氣殊不虧一生意凜凜可以厲詭隨願列  
君傳中存亡能幾時江西陳伯嚴爲文有古姿他年求  
下筆竊比聃與非

伯嚴示哭  
子朋詩

贈朱古微侍郎

賢者必自愛惡能隨世波乘興恣所之投閑非蹉跎侍  
郎忽挂冠不受歲月磨掉臂山水間時來聽清歌胸中  
定何物觸天峯峨峨詩詞亦間作絕世殊白科時人急  
祿仕未必師孟軻終老長囚拘所得竟孰多

隱几

解甲歸來倚市樓騰騰人海獨吟秋浮雲北極天將變  
落日中原事可憂不道竇陳虛眾望誰言王謝欠名流  
龍鍾儘著傍人笑隱几今年倦展眸

赴鄂舟中

萬波弄日破霜寒木落吳天意自寬少壯背人如去鳥  
江山還我此憑闌警傳萍醴醴圍初合災被淮徐賑已難  
多壘奇荒仍滿目漫尋猿鶴共盤桓

偕石遺登黃鵠磯懷白樓

城根水落轉崢嶸暫借茶寮避市聲兩郡楚山臨岸起  
一江初日抱樓生自披風帽貪憑眺旋輟藍輿試散行  
此去餘年幾相見好收悽歎付微醒

贈林贊虞侍郎



我朝二百年未嘗用閩士閩人入軍機有之自公始公  
雖負清望峭直素難比特擢由聖明此外更何恃孤  
立固甚危詭隨亦吾恥願先收人心以此立宗旨用人  
與行政切忌犯不韙但令識輕重緩急差可倚亦莫太  
矯激徐徐布條理朋黨兆已萌勿使禍再起時艱至此  
極任重甯足喜連宵語月下含意深無底惟將憂國涕  
珍重付江水

陶齋尚書屬題陶公亭雪夜評碑圖

天璽遺文窺倒薤昔嘗遇之劉與蒯

聚卿禮卿各有一本

陶公亭

上有新評完本神明遂無對我從黃鵠山頭來披圖讀  
碑懷暫開太真未敢輕江左絕歎夷吾是霸才

金山

山藏古寺望如城江去平蕪略可耕敗意俗僧過俗子  
舉頭詩境失詩情欲除佛宇千重障獨取吳天一段清  
太息無人知此意何年真看小崢嶸

江樓

當年若有感含意苦難寫何事更銷魂江樓獨吟者

王司直求題十二辰圖賦得猴

我生惟庚申於今實後死披圖償夙諾逝者呼不起王  
孫雖狡獸微劣何足齒吾窺岳瀆經祕記禹行水風雷  
阻桐柏木石盡披靡百靈悚奔集神怪出淮涘伸頸逾  
百尺九象力難擬騰蹕何倏忽應對巧莫比其名無支  
析狀乃獼猴似文命有憂之童律安可使終焉授庚辰  
遂徙龜山趾此公久厭世偃卧古井底萬牛引不前堅

定孰如彼

南京節署西園

以下丁未

風定平波寫綠條却迎初日皺還搖  
開窗驚散幽禽語一夜春寒欲過橋

當年弱冠過江初雙檣婆娑略憶渠  
猶有園丁諳故事夕陽閑話沈尚書

沈文肅嘗館余於此園

二月廿六日雨中詣雨花臺安隱寺奠顧五子

朋

清明俄已過雲氣暗建業欲尋野哭地度此風雨劫顧  
五未入土扣棺柰長闔素帷手自褰吞淚久於邑當時  
分手易豈意遂難合迴思前世事迷罔魂旋接病僧訝  
吾狀累問曾不答我曹時既逝待死等荷鍤沈吟起醉

酒何用戀一霎肩輿下高岡苦霧湧城堞照眼小桃紅  
泣然更承睫

三月初五日攜家人往龍華觀桃花至則已謝  
老去春歸最惘然龍華花事誤今年春光只在殘紅裏  
搔首何須更問天

處處池塘是綠陰春歸何處試追尋游龍流水空惆悵  
未抵詩人一往深

誰遣春陰換夕曛江頭暗盡燕天雲回車自覺無才思  
祇道來遲向細君

十里花光耀綠波經旬情事邈山河劉郎乘興殊愁晚  
拋盡華年奈汝何

三月十二日四十八歲初度是日自上海赴南



京

坐思老來味零落期漸近擊碎珊瑚枝於意終有吝解  
兵雖經年世故猶相恩奔波誰汝役縮手亦霜鬢今辰  
愈不樂新齒恩愛刃心知無萬全策馬突堅陣袖中銜  
詩本快快入吳郡形骸何足道所惜在方寸

平生自謂剛百鍊成繞指醜枝還著花一笑誠可已相  
歡曾幾時事往同覆水奇情誰能羈絕世騁恢詭勇決  
實起予我乃不如爾龍劍何必合小別輒萬里瑯琊王  
伯興區區爲情死

殘春二首

孤抱曾何惜殘春絕可哀不成依斗室復作攬高臺心  
與鶯鴻逝書憑夢蝶回司勳休刻意意盡恐難裁

近水生惆悵看天抱苦辛一閑成落魄多恨失收身又  
作江南客還逢白下春春風太輕別無地著愁人

三月十九夜四鼓

人起魚皆驚燈休室如晝素娥何所苦頓比前宵瘦  
月意誠太孤耿耿終無語碧落在窗前徘徊吾與汝  
林影何蒼蒼池光何皎皎夜色不勝清轉愁天欲曉

送春

檢點平生空自奇漸成灰燼欲何施送春可得迴三舍  
積恨應須塞兩儀來日塵勞殊未息餘年心病總難醫  
江南是我銷魂地忍淚看天到幾時

端午橋制軍屬題余忠宣楷書卷

尚書重忠義甚喜得余闕五百七十年嚮往記歲月闕

稱善楷書此卷果精密氣出烏絲闌嚴整見風骨釋褐  
授泗州結習殊未脫當時爲誰寫鄭重署官閤安知弄  
翰手揮戈乃尤傑孤立萬賊中江淮賴全活屯田治戰  
具經營非苟率大厦既難支終爲寇所沒翰林辭不往  
守死信苦節書生任軍旅所恃祇抗烈戍邊雖生還望  
古猶鬱勃

棄官

丁未四月二十二日授安嶺按察使二  
十七日調補廣東按察使辭不之官

棄官甯不遇厭世始猖狂欲老真甘死難行卻善藏累  
心情畧盡用短巧何妨此意將誰語憑闌送夕陽

六月十五夜與稚辛拔可至華園取涼

回首樓臺燈漸遠飄然人似月行空不須更看魚龍戲  
領取長橋徹夜風

送稚辛之日本

預言一年別歲月已銷除相見定何處自知非昔余滔  
天天正醉轉世世難居歇浦涼風味重尋恐不如

沈友卿周舜卿劉厚生招遊惠山

惠山以泉鳴天下蚤歲獨遊誰見近解衣小坐猗闌堂  
唯愛清泠盈石罍識君恨晚二十年好事重來覽臺榭  
樓廊墻宇互遮蔽名勝翻憎困構架貴遊子弟豈知山  
徒侈祠堂競陵跨稍登高處始出世鬱鬱郊原盡桑柘  
錫山一峰伏復起斷塔著天如仰射河流城市相掩映  
遙指帆檣認灣汜蘭稻歲易六百萬富甲數郡真可霸  
既富教之古有云成俗方看待文化橋頭徙倚戀山色  
窺客時時過嬌姹諸君娛我期盡歡畫舫清歌入深夜



此遊樂甚當再來謀爲東坡築精舍

題攷樓三石圖

攷樓好道更談元  
愛石風流繼米顛  
持比東坡袖中物  
孤根留爲捍滔天

廉惠卿招宴小萬柳堂

見說詩人氣屬秋  
秋來宜住水邊樓  
千絲柳影深遮岸  
一曲淞波穩繫舟  
詩酒朝官能小隱  
江湖雅集自清流  
吳興畫卷應猶在  
莫惜千金取次收

趙松雪有萬柳堂圖

攷樓屬題濟南十二圖

一枝碧芙蕖似向明湖插  
志業能累人如意空挂頰

華峯

挹爽

鵲山古洞天  
寒食幻烟雨  
踏雪有奇情  
試爲吳兒語

鵲橋

踏雪

濟南有此湖便欲江南壓瀟灑元裕之波間看玉塔

明湖

泛月

伏流忽涌出如觀茶鼎煎安得好事人更尋金綫泉

趵突

觀瀾

避熱向何處清風滿鐵祠懷人不可見菡萏在清池

鐵池

賞荷

雲歸山蒼然雲起化爲佛雲幻佛亦幻真相定何物

千佛

披雲

龍潭龍已去惟見石嵯峨爲龍長寫照天矯欲衝霄

潭西

拜石

人事堪勝天有術在因地立國莫如農爲君言水利

匯波

陳觀

萬樹飽經霜千峯留夕陽摩挲看山眼莫負好秋光

秋廷

石刻燒已殘樓觀亦何有盤谷覓題名苔花翳誰某

碑尋

真人乃非人大患在有身身滅神亦滅其人安能神

訪道

獨往將安歸釣名終不實何如潛亭人意中輕得失

獨釣

### 又題金陵三羽士錄

彼曹能厭世我乃未忘情身外留文字人間說姓名君  
胡錄三士翻似關長生生死原難了年來意漸平

書日報後

一生走仁義自謂性所有未甘師古人况逐筭與斗戊  
庚逮今茲躁進互擊掊謬興種族論國事迫解紐惟予  
倡羣學蕩蕩開天牖滔天幾漂山終欲關其口彼曹身  
倏滅誣我冀不朽甚黠亦可憐笑罵顏孔厚諸公工罔  
上撫衷果安否名德既不昌彥回豈爲壽

雨中過如臯贈知縣周松孫

子厭京塵汗能來宰此鄉官身貧益傲詩境老彌蒼入  
縣逢秋雨看圖話辟疆自嫌行太急別酒沸離腸

惲瑾叔見贈長律四十韻

才人自有好文字常恨人間無可人一讀君詩還失色  
誰從地上見麒麟



長律縱橫豈易言義山學杜有根源看君凌厲嫖姚處  
錯認來從惜抱軒

答夏劍丞

深人何妨作淺語淺人好深終非深觀人以此得八九  
能辨深淺真知音夏君善我比子尹子尹絕肆吾所畏  
冷情暖思却難同飲水自知在餘味舊學商量今有幾  
終讓義甯陳君耳夏君才調更清真長吉誰能加以理

答姚叟

看君飄白髮意氣百重哀我輩行爲土當年豈再來一  
言銷爾恨成敗莫論才歌管喑鳴地沉思更覆杯

揚子勤松窗輯書圖

雅頌賜名嘉慶年八旗詩集已流傳更看文苑搜奇作

始信經香配昔賢祭酒傷心古懷抱使君慧業舊因緣  
松聲窗下添悲壯想見初成作者篇

八旗文經附有作者跋三卷

嘉慶中鐵保法式善輯八旗詩集進呈賜名熙  
朝雅頌集盛祭酒昱與楊鍾羲復編輯八旗文  
經五十六卷張之洞爲之序

丁叔雅示蟬叟書冊

蟬叟吾酷愛謂可追楊風玩其使筆處如開兩石弓篆  
書到陽冰分書邁蔡鍾真行已小低米董一掃空主張  
在北碑擺脫餘顏公常熟誇意態雅步頗雍容視何究  
莫逮飛走技不同

目中有蟬叟他書不能觀久久漸自厭愈親還不安坡  
公誚冤駭苦驕實至言魯直晚言書款側實不完稍會

二子意轉愁筆墨痕叟固吾不欺世外自有天

狄楚青屬題明人墨蹟三種

景泰能守國太上竟得返于謙不世功戮之豈無赧小人競功名朝事幾覆反懷才卒難全翰墨空挂眼

于公謙

南仲阻李綱潛善害宗澤偉哉楊廷麟一疏褫奸魄象

昇實文士事急能死敵草書摹逸少所得亦勁特

盧公象昇

明亡得何瞿養士云有報崎嶇守桂林事去卒無效待

死且賦詩從容良弗撓卷末不書名默然尤可悼

瞿公式鼎

題海昌徐垣雲柯鄉思親圖

奮身赴清流以策全兒女兒老苦思親親亡纔廿許孰能減已齡持以壽阿母不憚傷君心少孤自哀楚

殘歲

殘歲每添懷抱惡北風弄雪晚冥冥捐書未必遂聞道  
厭世何爲空養形歌哭聖狂喧海市酣嬉醉夢祕雲屏  
人間正有沉迷樂莫信靈均說獨醒

雪中書所見

以下  
戊申

春雪旋消不待覲散亂飛花空照眼却攙凍雨弄風寒  
猛撲車窗勢殊悍胡姬犯寒更縱馬玉色頰顏豈知暖  
滿身風雪出我前縮手吾儕應自赧戍邊生還常稱幸  
世事厭聞唯飽飯因渠頓觸枕戈心便擲殘骸何足算

傷女惠

二月九日卒於天津  
醫院暫厝望海寺

彌明纔十三別我已二年豈知乃死別一去更不還汝  
母有萬恨我懷抱千冤小影宛如生淚眼誰能看大錯  
真鑄鐵驅汝向天津讀書本有毒將毒與汝吞自從別



汝後好語常聯翩時時寄手書字體頗清端從姊學操  
琴比姊尤熟閑絕怪絕好潔不飾而自妍同學諸女伴  
愛之如弟舅誇汝輒自喜憶汝忍不言如何忽嬰疾宛  
轉遂經旬遣僕雖往迺刺促心搖魂惡電從天來鬼刀  
截我肝從此與汝絕回思深可憐我欲執汝手汝手何  
從牽我欲撫汝面空想悲啼顏我欲拭汝淚却覓衣上  
痕我欲抱汝身惟有三尺棺死生事則已父女名空存  
向來千萬念念念皆傷恩東坡四十九煩惱悟無根我  
何似樂天悲哀念金鑾

二月二十一日又至南京

撫膺一歎上江船風味依稀似去年已等彭殤休感事  
次女彌漸成遲暮更違天野梅褪白紛紛雪官柳吹黃  
明新天

處處煙斷送情懷誰會得只將悵惘替留連

閱白詩簡簡吟因吟四句

人間只合十三歲阿姊阿孃淚莫揮須信彌明如簡簡  
琉璃易碎彩雲飛

過繇俠營故居

此地沉吟夢幾場最難消遣是斜陽豪堂已逐荒煙散  
却認鍾山作故鄉

題龍女牧羊圖

彼姝何來態非常風鬟雨鬢神悽傷如有所牧羊非羊  
行吟澤畔追沉湘嗟爾所遇乃無良厄爾者誰豈蒼蒼  
有情爲玷百不臧與世委蛇道未光飛騰變化乘陰陽  
胡不捨此空旁皇

題陶齋所藏瘞鶴銘水拓本

羣鶴翩翻各冲舉目送靈真將出世世人塵滓滿毫端  
正坐尸居帶餘氣紛紛聚訟開如沸逸少華陽俱可置  
君謨老眼有微言指出隋賢參楷隸楷相參轉出奇  
誰將此意試求之學書聊取記名姓平正欹斜任自爲  
焦巖蒼蒼隱雲水上皇樵人呼不起留待丹徒陳善餘  
辯證橫山殊可喜

善餘謂上皇山即京口之橫山證據甚確

題女景扇

得汝歸來暫解愁將行無策更淹留身閒自覺心猶未  
欲遣悲歡覓小休

贈孟莚孫

由余與子臧默然意自合可人豈多言空山生響答觀

君非世士新故巧吐納讀書兼讀律撮要及名法冥冥  
丘軻理倏爾精神接紛紛不根談本領信難雜行看開  
赤縣持此超恒劫誰言天道遠稍覺人事協頻年溷市  
塵意氣各蕭颯長大能勤學安敢望伯業回思兵間日  
狡獪猶縱鵠收身今垂老堅坐穿木榻竒文莫使看心  
喜防見獵忽似決江河彌天動鱗甲

偶書

事會來無窮昧者機自失以齊猶反手非妄殆可必平  
生濟時懷千萬不售一垂老幸收身逍遙送餘日

陶齋屬題歐人水畫冊子

峰能射日澗能幽雲自行空海自流見畫衆賓必驚倒  
樽前敢請話前遊



答嚴幾道

嚴侯本武人科舉偶所慕棄官更納粟被刑嘗至屢平生等身書絃誦徧行路晚邀進士賜食報一何暮回思丙丁間春闈我猶赴都門有文會子作必寄附傳觀比尤王一讀古俱吐誰知厄塲屋同輩空交譽天傾地維絕萬事逐煙霧八股竟先亡當時殊不悟寒窗抱卷客億兆有餘詛吾儕老更黠檢點誇戲具煩君發莊論習氣端如故

偶記林穎叔述左文襄語再答幾道

左侯居軍中歎息謂歐齋屈指友朋間才地有等差進士勝翰林舉人又過之我不得進士勝君或庶幾歐齋奮然答霞仙語益奇舉人何足道卓絕惟秀才言次輒

捧腹季高怒豎眉觀君評制菽折肱信良醫少年求進士得之特稍遲風味如甘蔗倒嚼境漸佳何可遽驕滿持將傲吾儕不穀雖不德自知背時宜三十罷應試庚寅直至斯誓抱季高說不顧歐齋嗤君詩貌煩寃內喜堪雪悲官裏行相促老蒼仗頭皮八股縱已亡身受伏餘威知君不忘故得意還見思

爲鄒懷西題鄭子尹爪雪山樊圖卷

經巢九卷詩讀之良已久每觀子偃序可信視其友平生何多能處處見高手論畫詩已工畫更出其右山形外阻江築砦勢愈斗依山數千竈避亂足自守左瞻峰稍高其陰帶林藪居人耕山腹厯厯挂千畝此峰苟不據高枕果安否筆端饒蒼秀草草意轉厚大癡得遺法

甚穩定非偶三詩集未編雋若新脫口才高學且稱誰  
繼殆未有

改庵屬題董元宰書蹟卷子

高江村所藏  
號金沙帖

書家變法法益奇近代惟有楊少師鴻堂著錄信具眼  
晉唐格轍如兒嬉魯公清真未險絕獨取米老吾猶疑  
又聞香光晚年語甘從公權背獻羲始知避滑必就澀  
自諷所短非吾欺諸城繼作欲變董持比登善防澆漓  
卷中劉石  
庵跋語堅實板鞭誰辦此筆前未免慚疲羸區區分  
別皆妄鑿強向故紙評妍媸改庵多執書尤擅我亦學  
步聊追隨何當擲筆睨天際胸無古人任自爲

題吳江葉天寥畫像

天寥爲浮  
屠以卒

薙髮令方嚴是翁獨不屈何必慕生天餓夫自成佛

九月二十四日葬彌明於蘇州木瀆米斗山

骨肉須歸土來分木瀆山離魂傷弱女揜坎變衰顏湖  
海聊飄泊彭殤亦等閒有誰觀季札左袒便東還

贈高獻桐

詩書饒胃中何地堪一吐使子居諫官奸佞必敗露忽  
聞試第一彼族乃凶懼邪正不兩立事急復奚顧居然  
置勿用遮日手可怖於君究何損微哂就歸路端人遂  
裹足所係豈細故

吾儕各垂老薑桂性愈粹固知不可口安得變甘滑無  
言人已憎何苦更强聒此行君勿悔惜玉甯避刖苟求  
心所安得失等毫末暫遊塵土中益覺江海豁天寒病  
初起養氣幸勿忽



高樓僑居歇浦戊申小春適 鼎湖耗至海上

訛言騰沸出門悵惘中信步至張園夕陽黯淡  
風葉翻飛車馬亦已闌珊逡巡間於塵轍中拾  
得殘紙書嘯血三首字跡敬斜語意詭痛蓋攀  
髯墮弓小臣之辭也

嘯血虛傳杜宇魂甯聞帝子更沉寃天荒乍破身終殉  
日喪云亡道自存一夕雷風迷大麓十年虎豹厄丹闌  
幾時修得金輪史纔信無終是至言

戊戌銷沉庚子來種因得果更誰哀忍教宗社成孤注  
可奈君王是黨魁妄意揮戈能退日傷心失箸託聞雷  
咎繇聽直須天上好勸長星酒一杯

龍飛三十四年春識主何曾見一臣持論遂令人掩耳

於南皮坐聞當有皇帝人君太后人臣之對棄官誰信我忘身  
暮腸坐憤妖吞月鵲首空愁醉賜秦試問和燾舊朝士不欺先帝定何人

十月十四夜月下

風從北來寒吹此一街月道人默倚樓手理衝冠髮  
天王乃見幽畢世意不展疑獄卒難明孤臣涕空泣

留髭

以下已酉

五十始有髭見事良已晚留之定何取每顧輒自哂拂  
唇頗不耐竟日手勤撚旁人知諱老熟視謬稱善回思  
兵間日身手絕精悍乞歸三載中花落雲雨散當時若  
有靳用意乃至淺少年既坐誤短景何足算青山對滄  
浪世態凡幾變

幾道見和留髭詩易韻答之

華風不喜須所見等婦孺云何作官人威儀必先具西  
俗老去髯領雪意若惡陶齋每見嘲還童殊可慕今年  
毛繞豕顏鬢不容駐漢廷方用少我意難詭遇唯堪助  
苦吟撚斷亦風趣嚴侯蚤相許愛重及遲暮相看雖未  
衰玉貌殆非故尋芳更載酒春至勿自誤窺君珠飾帽  
絕歎美無度

幾道懶磨  
常綴以珠

題楊叔嶠書蹟二首

諸郎坐熱中駢戮空召亂溫雅如楊公何爲及此難  
戊戌七月間獨宜用裕祿吾謀卒不遂野寺餘一哭

景皇帝僧樞將諸臣惟裕祿頗得  
上意孝欽亦信  
之余欲語叔嶠竟不及見他日乃哭之於清隱寺

輓高嘯桐

聞君憤慨傷時語病骨全銷氣未銷熱血一腔無地灑  
英魂九死待誰招平生孝友非新學舉世炎涼自後凋  
宣統紀元雖及見欲將小傳屬先朝

廉惠卿屬題其配吳芝瑛手書楞嚴經

多才真墜落何術堪自度云何謗汝隨正坐高名故謝  
庭傳家學四海驚詠絮工書亦茂猗簪花足天趣傷心  
古懷抱好事表秋墓誰知挂彈章雖解有餘怖寫經信  
宏願佛力必潛護因思起浮圖更借湖山助世人方造  
業自謂殊不誤是非置勿辨功德積有素書成定圓滿  
巧腕生妙悟他年比彩鸞唐韻難獨步

叔孫通

三代不相復古禮雜秦儀皇帝欲自貴稷嗣誠先知置



酒長樂宮謹譁孰敢施諸生服其聖希世惟委蛇儒者  
可守成此言亦庶幾何殊畜俳優面諛良可悲兩生惡  
汙我自謂不忍爲各行其是爾史遷煩微辭

朝廷設禮館發端自岑公此舉誠重大當世誰儒宗徵  
辟等齊魯殘庵始登庸禮失求諸野聚訟愁相攻自秦  
逮本朝沿襲久不衰孰能知禮意稍取三代隆節文刪  
拜跪服色觀會通吉凶軍賓嘉救僊必以忠莫疑近夷  
禮墜地悲華風

閏二月十七日獨遊龍華

春雲欲吐曉霞明醞釀紅潮醉未成人影漸遮風漸暖  
江波初漲雨初晴試編遊騎歸花史便割吳天作錦城  
可怪路旁沉吟者色塵夢恨尚縱橫

季直之子怡祖十二歲賦登塔詩曰凭欄詞客招  
新月隔岸漁翁唱晚煙季直自作詩曰阿翁十二  
始爲詩今汝追翁欲及之願汝立身求學問要如  
登塔最高時又爲怡祖請余書扇乃賦此遺之

老夫恨不學無術返童幼兒曹能自前奚翅與我壽嗇  
翁無窮意歲月苦難究遲遲出定論晚子殆天授自吾  
見怡祖喜子勁在後不愁强弩末再厲端可殼晚煙新  
月作思致絕雋秀家學不獨詩風氣果已就

### 哀五十詩

狂癡不省生有涯俯仰五十良可哀一生到此小結束  
置我何等猶疑猜讀盡舊史不稱意意有新世容吾儕  
自憐伎倆止於此聊借結習藏形骸高樓倚天送白日

遺世儻是丈夫魁聲銷影滅夕可死萬一不死能重來  
鼓行更出背水陳誰肯作此窮安排朋輩醵飲情可感  
嚴侯有作驚雄才一聞楚歌氣欲盡何異垓下悲重圍

戲贈王又點

手散千金才不盡老來風月最關身浮名何似生前酒  
豪氣還尋客裏春差喜先生能作達劇憐吳女亦工頻  
詞流誰擅言情者遮莫花翁是異人

劉後村稱孫花翁名重江浙公卿倒

異人

從母羅母詩

諸母各明達今惟羅母存親見事大母辛勞世所難卧  
起必扶掖動作必周旋寒燠必早覺飢飽必先關頃刻  
不可離母女如一身母食女乃餒母寢女乃眠牀有被

與褥厨有粥與饘一一女手治否則母不安母病不知  
苦惟覺女益艱母愈不知樂惟見女轉歡母活女手中  
如是凡數年既寡行愈高教女兼撫孫深入德育理默  
化若有神蠢者失其昧頑者棄其嚚不煦彼自柔不怒  
彼自馴遷善競自媚改過且不慳日遷於上流孰知所  
由然前年自濟南奉迎來海濱家人未聞道朝夕使相  
親上下知敬愛莫能窺其端今年忽思歸有廬依烏山  
山兜連巷尾兒時所往還往事不可思思之在目前諸  
母與吾舅誰言謝人間吾母行第四厭世早生天或言  
胥似母此事誰知焉作書啟羅母秋風幸回船隨遇儻  
可安聊欲營一椽細詢吾母事書之爲長篇當令天壤  
間矜式諸母賢



海藏樓詩卷第七

閩縣鄭孝胥

海藏樓雜詩

奮身欲何往盤空殊未安  
高樓一日成截然如斷山  
脚根愈堅牢世態愈等閒  
羣囂不易到鳥語時聞關  
道人袖手人所患猶多言  
今年有新得稍簡應對煩  
獨居不負樓種松待參天  
妻子真我客歡然來扣門

其一

露臺性宜月我性愛登臺  
月豈與我期臺成月自來  
從遊者清風披襟共徘徊  
便當凌霄去惜我非仙才  
人間實汗陋孰能委形骸  
可憐玷風月撫膺暗生哀  
碧海連青天月逝我獨回

其二

樓東多栽竹寄意在避俗  
頗聞人驚嗟新竹鬱已綠  
凜

凜十萬夫森然態何肅微吟向風前和我以憂玉吾詩  
豈輕作對爾詠不足未須矜歲寒且爲解熱毒

其三

移櫻四十株穠麗會成列心知非我春耿耿意不滅當  
年空能狂過眼纔一瞥對花欲抉目積恨誰與雪猶餘  
惆悵味老去未忍絕刻意仿司勳傷春更傷別

其四

卿士楊哲子偶然出國門登我海藏樓示我海月篇其  
辭哀而傷使我久不歡世方忌子名悲歌聲宜吞能去  
何足奇不去人所難莫學汲長孺上前論積薪翺翔公  
卿間不失箕子仁豈羨海藏樓辟色復辟言

其五

吾樓雖甚壯高寒難久居長安居不易視此定何如缺  
月上稍遲光彩鋪平蕪茫茫墜碧煙誰辨樹與廬幽人  
一再起已是四更餘闌干獨來倚涼風裊衣裾吳姬歸

夜闌馬蹏騰九衢千燈出林影照乘霏明珠向曙忽隔  
世喧寂理豈殊

其六

幼時學爲文獨喜柳子厚斷刑與時令熟讀常在口近  
人尚桐城其論深抑柳陽湖實支派相襲亦已久柳文  
彼所輕學柳更何有奇人吾煒士愛我忘其醜咨嗟媿  
室辭沈至信高手子亦毘陵宗胡不憚衆詬損名勿輕  
言意子適被酒

其七

二孟天下才意氣不盡同少孟似賈誼長孟真揚雄出  
言爲布帛孰與少孟工微詞有千秋誰追長孟蹤吾獲  
從之遊相逐猶雲龍一時幾豪傑萬古羅心胸

其八

密雲久不雨日色淡以幽坐聞風蟬聲颯然已成秋蕉  
葛愜初涼紈扇可小休委心得無爲直與造物遊形骸

猶可用所樂在此不捐書苦未能多事真吾憂

其九

遼海程中丞其身已許國以書招我遊意我方懸的時  
賢坐躁進未免就枉尺何如姑養氣期與天地塞已重  
物自輕此局或可奕

其十

倚樓聞妙香心知必有異披衣行草際初日未到地叢  
蘭雖競開微甘豈高味幽尋入籬側泠泠襲露氣一花  
藏深碧冰雪抱殊致踟躕欲却步絕世難逼視素心非  
吾侶自顧果形穢端逢姑射仙綽約方掩袂悵然不能  
去有意在塵外

其十一

雨過雲亦歸林氣重不散滿月如帷燈隱約出天半須  
臾碧將合粉彩發璀璨銀波漸流空濕霧漲瀾漫園林  
遂平沉樓閣若隔岸登臺攬明鏡照膽不可翫寒光來



通身左右晃凌亂凜然赴奔潮露頂白虹貫一涼遽至

此始有秋風歎

其十二

義甯賢父子豪傑心所歸伯嚴不急仕峻節如其詩栖  
遲對蔣山睥睨鬱深悲天將縱其才授子肆與竒神骨  
重更寒絕非人力爲安能抹青紅搔頭而弄姿昨者哦  
五言緘封肯見遺發之惟鶴聲一一上天飛高談闢戶  
牖要道祕樞機願聞用世說胡爲靳相規噫嘻戊戌人  
撫心未忘哀大名雖震世豈如我獨知

其十三

物生必有耦二者道之門俗士務執一百世成爭端寒  
暑與晝夜相需不待言彼此各是非孰能爲平反聖智  
坐未達著述迷乾坤強同誠可哀末流遂滔天摩厲得  
發明轉戰亦競前哲人非世用宥之入自然

其十四

合羣時未來衆勢苦易散相安三百年可慮在滿漢外  
族方侵凌萬鈞繫一綫幸君毋絕之失手且糜爛漢存  
滿自安其意豈好叛誰令走胡越迫之乃驚竄惜哉無  
大臣獨立濟時難棖崩僑將壓子產空悽歎

其十五

秋風卷地涼秋雲漫天白雨氣欺日光晦明忽殊色廣  
除草未黃竹意稍蕭索此樓雖物外傲物非崇德世間  
孰堅脆一逝等過客完茲獨往興於我如有得

其十六

樓中好雨聲入夢猶有味曉來一推窗晴麗足佳氣花  
竹如新沐弄日獻百態身閑聊自悅徙倚即世外抗聲  
咏詩騷隨風入天籟橫空嘯鸞鳳過客或驚怪誰知孫

登狂不與稽阮輩

其十七

秋深氣數變早覺因始衰息燈寒稍入幽幽如相欺布

衾頓不支腹鳴輒欲遺晝動而夜靜遂悟此理爲起行  
遶室中運氣達四肢徐令血充體煖力歸腰圍濟勝須  
有具筋骸非曩時獨寐還晤歌夜色付與誰

其十

湯趙走相語南皮昨已薨鬱鬱此老翁其意甯樂生一  
生抱忠節舊學頗殫精惜哉如紈扇秋至難施行公常  
稱我詩謂非世士能江湖雖浩蕩隱媿知己情年年泥  
憶雲今日殊幽明病中必見恨此恨終冥冥

其十

抱冰堂中飯餘味猶在腹別時恐遂絕所欠惟一哭棄  
官如棄世用意固已毒知公疾我去積憤亦殊酷偶然  
見其詩失歎不自覺却求爪雪卷感念定何觸功名果  
滅性並世迷九曲子期既云亡高山欲誰屬

其十二

南皮見余題鄭子尹爪雪山樊詩乃屬奇茂  
查求其圖卷看之此鄭懷西告楊壽彤語也

南皮往論詩頗亦執偏見素輕王右丞於詩乃尤訛詩  
人陳子言所學最矜鍊以余比摩詰境靜詩愈遠桐川  
有奇興真味不容亂君其追裴迪和我竹里館其一

蟄仙將入

觀忠憤不可當我欲三薰之少安莫怒張

事君信乃諫未信必兩傷百傷亦不惜知子抱烈腸天  
下事之大氣平臂奚攘覩子樸直姿當使羣疑亡多言  
定何益無欲誰則剛朝廷患多欲孰知我非狂其二

石遺失其偶孤吟稱老鰥故山愁獨歸豈如寄朝官下  
筆不自休神傷賦蕭閒江郎才未盡晚景尤悽酸別來  
肆於詩皮陸可躋攀鰥夫與冷宦氣味極相關流傳悼  
亡作微之何足言其二

十三

昨宵不成寐稍倦上燈後閉門更强坐睡味如中酒對



書輒瞑目執筆屢脫手意中謂殊蚤數起自斗藪俄然

若不覺驚覺風怒吼朦朧疑雨至窺牖粲星斗

其二十四

寄禪本才士爲僧名轉盛見嘲壬秋翁島瘦心所病今年學寒郊風味頗峭硬雖云六十化未免近鉅釘山人當自壽雄據天童勝以詩作佛事四海必響應聊爲童子戲直入散僧聖

其二十五

王壬秋謂寄但能島瘦不能郊寒

古稱鞠有華獨以黃爲美何時種始變爛漫如錯彩燕都重細株虎鬚必登几九華與金管堆眼衆莫喜揚州花稍竒過江似難比滬濱盛花事佳植鮮入市吾園緋與褐殊態各倣詭瘦癯捲綠心含意藐金紫閉門獨婆娑幾日風雨裏聊與花爲徒呼酒試酌彼

其二十六

枯坐欲成夢寒意侵兩膝起看天如磐乃有數星出披  
書漫不省伸紙復弄筆舍此窮生涯娛我更何術少年  
心未盡悵惘若有失沉思旋自哂世味孰可悅惟當持  
一念期與造化滅冰天雪窖中何事戀餘熱

其二  
十七

孔子語聞道乃曰夕死可聞道知幾人死者蓋已夥讀  
之每失笑求道計殊左道自有生死安之實在我畏死  
而樂生死遂爲子禍吾今伏孔子敢死氣磊砢彼云魂  
有靈亦未脫韁鎖

其二  
十八

北風葉盡飛樓閣乃傑出高處雖甚寒苦自戀斜日夕  
鳥何所歸原野頓蕭瑟隣園蓄蒼翠彌望桂與橘誰令  
愛春華衆芳有時歇悲吟吾不讓枯槁性所悅聊將窮  
年悲酬彼芳菲節

其二  
十九

拔可自山塘遣船致雙牀聞之喜不寐隔日信始達園  
丁趣往迂擇地坎先掘入門勢夭矯鱗鬣翠欲潑栽時  
躬審視築土務堅實植援護其榦枝葉忌磨憂舉臂試  
忖量官尺逾七八齒應與吾等乃爾成俊物徘徊走復  
來吟翫至日沒竟夕爲渠愁時聞北風刮

其三十

遼東已難收遼西事欲去諸客方開堂主人向何處東  
隣假兵力移民亟盤踞意圖數年間逼我以生聚列國  
知其謀染指競借箸吾民如寄生覆巢在旦暮國亡定  
何狀觀此應可悟朝端誰人傑鐵錯煩屢鑄永貞劉興  
甲訪我如有訴吾聞二子來舉足不及屢見渠先致唁  
聊以沫相煦及今猶可救投藥勿再誤遼民休酣寢人  
事委天數

其三十一

守國知以兵何如守以民無民孰與國恃官終難存吾  
民弱至此久散不能羣救亡事雖急翻欲治本原揚湯  
以止沸豈如去其薪滿蒙苟相合不下千萬人部落得  
漸強地利誰能分交通實上策速決胡遂巡錫公持此  
謀程公爲我言我許爲一行暫爲諸侯賓悲歌極慷慨  
老去彌苦辛

其三十

萬物役於人見用乃爲貴是豈萬物情誣之因自遂試  
看鶴乘軒孰與翔天外惟人有殊性徇意終不悔少游  
與文淵兩已適相背平生各輕擲老去若可棄每思犯  
至難頭壁誓俱碎惜哉時無人誰解賞雄概樓頭意萬  
里縮手久不快倚闌更小留安閒故常態

其三十三

東北劫愈急問策乃及我樓前招片月仗劍向遼左強



隣久阻兵跨海置遮邏吾民被迫逡待斃但僵坐其鋒  
誠難爭善守抑猶可杜回有時顛食報在魏顓姑求振  
民氣申傲首媮情死灰儻復然行見陸渾火人言柔勝  
剛精鐵綿與裹試探囊底智籌一不須夥

其三十四

題甥女王宜人旌表孝行事略

東景韶大令之室

淵深自垂髫長成曜玉雪粹質類至柔血膚意何烈相  
攸得佳士而父語甚切俯仰完一生醇行理不滅應嗟  
安仁賦審禮爲良匹

得胡梓方書却寄

盛國今何日滔天逮此生幕巢甯可託厦木欲同傾物  
外高樓在樽前舉世輕報書無別語收淚復縱橫

偶占

老去猶疑出世難  
斷哀殘恨邈無端  
回眸赤縣浮沉裏  
却似須彌頂上看

題孫師鄭吏部雄詩史閣圖卷

近代詩才讓達官  
曾聞實甫論詞壇  
易實甫言近人官愈大詩愈好南皮

常熟是也潛夫只有傷時淚也作君家史料看

題朝鮮金澤榮東航本末

破碎山河剩斷魂  
脫身猶得客中原  
朱家郭解子可託  
莽冒勃蘇誰與援  
殘史難成虛抱籍  
遺民已子更銜冤  
如聞博浪椎能中  
奮筆何辭賤血痕  
時韓人安重根刺殺伊藤博文於哈

爾濱

題楊補凡懸蘿釣渚圖卷

懸蘿水石鬪清奇  
長遣山樵羨釣師  
何日扁舟落吾手

一溪風雨看離披

題沈子培六十僧服小影並寄季直

身晚情孤話舊難只將心事付蒲團  
獨居便合稱聞道厭世何曾待去官  
零落生存雖未盡浮沉離合總無端  
江頭海澨堪相望賸遣閑愁入歲寒

諸貞壯吳倉碩見訪不遇

閉門祇有竹千竿題鳳人過晚日寒  
正恐時艱妨寂寞時余將赴奉天欲論舊學苦衰殘  
缶盧書翰推三絕貞壯詩篇感百端  
他日高樓須畫本二君合作試求看

十二月二十八日自大連灣至奉天觀日俄戰處

三日扣舷歌小海登車始覺入遼東  
漢廷誰解施中策廣武空嗟關兩雄  
斜日高原猶血色層冰斷岸自悲風

幼安蹤跡殊難測見尾神龍論未工

讀江侍御春霖彈章書後

以下庚戌

爾輩紛紛負景皇從今四海見封章諫官如此甯非  
瑞名教復明殊有光狐鼠成羣人可去蓬蒿作柱事堪  
傷臺中閱道應無恙獨立雷霆待汝當

謂趙堯生

天津贈趙堯生侍御

哀樂常過人有意誰能會見君誠恨晚慘慘心相醉立  
朝難久安一去志詎遂徇名亦烈士獨往何所畏

又書堯生扇

當年晦若嘗相語絕頂初晴看雪山煩把峨眉從頭說  
不須疾首到時艱

顏氏園獨坐



浮生忽在斯斜日耀高館形骸誠有用憑此聊把玩南  
華非僻書推去復取看了不異人意姑作須臾伴迴廊  
亦可喜風竹拂淩亂豈無胸中鬱白晝故易散所憎欠  
安眠往事犯夜半

寄答張貞午

抵掌爲大言臨事苦才盡才盡智亦窮於事或稍近一  
生數蹈此久爲深人哂自知不量力正坐疏且淺此行  
雖應募耐事實所短朝官多老手善敗終不窘得失置  
勿言急脈受以緩尋君遂初賦惡聲孰能反三旬閉不  
出花發風稍煖未須惜春老心事殊恨晚久閑思自試  
甫出意遽嬾家書一言歸夜夢已先返送行盍預作俊  
語不可忍

錫公良使余至天  
津讓錦受鐵路事

留題顏園

顏在奉天未見主人以書致余求作詩

飛塵不到暫盤桓  
借得高齋獨倚欄  
竹影繞廊宜曉日  
花香依榻愛春寒  
來遊我亦屬樊榭  
好客君應辛幼安  
須與名園成故事  
留題隨處待閒看

天津雜感

十二年前我復來  
人民城郭總堪哀  
迴車腹痛過書塾  
還覓嬌嬰放學回  
天津縣城燬於庚子余以戊戌出京過此次女彌明寄讀於文學堂未幾而得疾而殤

杏花淡白過清明  
新綠含黃出遠林  
聞道寺門堪望海

自摩老眼欲登臨

彌明嘗厝於望海寺

絲管聲悲那可聞  
千塵萬劫墮寒雲  
憐耶只有傳經女

閒話歸來每半醺

數過女景所居醉歸

津沽雜感

小窗風竹亂斜陽門掩盆花脉脉香一種悽迷渾似醉  
不須添酒入愁腸

莫信人間有後期狂花風裏自難持袖中書字何曾滅  
恰到三年意盡時

曉色瞳矐吐豔陽風懷雖盡意猶狂桃花狼藉君無歎  
更與從容待海棠

年來得酒思拚醉不飲何能似昔年醉得幾年情又變  
從他更道不如前

海棠半開天下媚留取五分作春睡心知會有開盡時  
且賞花前未開意

心許誰能意遽寒盛衰開落太無端花前連日東風惡

却避殘紅不忍看

四月二十日渡海

自天津赴滬

南行天轉涼向夕海愈綠成連去何之風濤自終曲  
苦縣道猶龍於陵操如虬海若無是非坐看落日盡  
栖栖旋兀兀忽忽復遲遲趙女言微中阿誰似若癡  
箕斗不能神獨愛橫天彗借汝爲掃除一豁平生意  
長歌還入關垂老氣更烈挾山超海意賸爲兒女說  
白日金騰湧蒼波雪散飛海山與兜率何處是真歸

贈呼倫道宋小濂

聞道聲名出苦辛不須識面已相親熟知邊事真無敵  
偶喜詞章又絕倫五十風光吾亦過等閒豪傑世誰珍  
滿洲若有圖存策要及中年用此人



六月二十一日夜起

林暗幽光起樓高碧落通微風成獨夜涼月亦凌空草  
草隨殘劫紛紛誰長雄死棋聊插手吾道若爲東

燈下偶書

新涼有味在秋燈悅耳風蟬得未曾祇道貪涼宜蚤睡  
因涼引睡却堪憎

七月二十三日入都居賢良寺

前朝夢斷十三秋闕下車聲在枕頭胡騎黃巾歸稗史  
劉郎道士各山邱自殘母子恩同盡永訣君臣恨未休  
身似銅仙携盤去回看鉛水淚難收

答諸貞壯

如許元規塵汙人能來暫對共悲辛奔車未必無尼父

中坐何曾見伯仁  
隱几市聲消晚日  
穿廊禪課動比隣  
看君玉貌平原客  
心膽輪囷豈帝秦

秋聲

墻外紅塵自帝京  
葡萄新棗競秋聲  
人生幾許膏騰味  
看盡西廊晚照明

廣東提督秦炳直母袁太夫人八十壽詩  
予謫  
愛日兼夏冬  
諸郎極文武  
母莊若嚴君  
謹畏幸不怒  
羨渠身貴顯  
繞膝懷撻楚  
入門見禮法  
稱壽簇簪組  
解顏博一歡樂  
甚觴自舉晚  
世溺於慈誰  
能望賢母

中秋胡盧島夜起

天開遼東灣  
海獻壺盧島  
通塞豈有數  
營此恨不早  
何來海上客  
負手睨蒼昊  
驅車涉驚潮  
躡屐下峰杪  
舞鷗

翩相迎擊浪忽羣矯水母大如輪攬視旋棄掉岡巒紛  
離合醜海作數道西北如列屏開場對浩渺千載置不  
顧得之出意表長隄截怒濤可使變城堡豫期十年後  
樓觀鬱相抱層冰雖觸天到此蕩如掃向夕雲密布疏  
雨涼嫋嫋宵深夢一覺吼嘯頗相攪開門月未墜飛雪  
捲秋縞羣山正弄影倒浸參與昴洛神疑欲出絕世凌  
縹緲清寒不可當仙骨嗟已老救時獨悲憤後著苦難  
好却思歸樓中酣眠直至曉

讀杭州瓜爾佳氏節孝忠義合傳乃金梁希侯  
家乘

一門節操照當時追述真成字字悲誰是傷心古懷抱  
好收忠義入肝脾

八月二十六日遊萬泉河

俗呼小河沿在奉天東門外

瀋陽無山沈戰氣秋色真從萬里至繞城何處可登高  
憎見諸羌踞僧寺北俗雖豪缺風雅麇集屠沽作都會  
東門聞道有泉源便覺清甘起人意碧波潈洄僅十畝  
傍水居然蘆滿地殘荷過橋香自遠禿柳數株堪小憇  
若能營此作園池種樹置亭亦殊易縱民游觀資養性  
豈非從政所有事沉吟徙倚誰與言自怪邊塵損文字  
九月十五日遊勞山題柳樹臺酒店  
緣澗漸深天漸小回看惟有亂峯圍山風吹得塵勞盡  
酒釀花斑莫念歸

九月二十一日出山海關赴秦王島

黃入榆楊霜又催關河搖落正堪哀亂鴉忽逐秋風起



似有詩魂結陳來

偶憶劉夢得詩

秋毫爲重泰山輕  
自覺年時寵辱平  
却笑劉郎再來日  
千帆萬木動關情

十月初六夜新康舟中

碧影隱含芒浪頭  
弄微彩風急莫開窗  
月痕吹入海

十一月十八日出山海關

今年遼瀋頻來往  
每出榆關一撫膺  
海近天垂含浩渺  
地平山縱競驍騰  
危邦空歎吾爲虜  
浩劫終愁谷作陵  
儘有邊才誰用得  
翻飛遙想郅都鷹

稚辛小女微墜樓得活寄詩壓驚

發書猶失聲忍問  
抱起者三日乃稍蘇  
寸步誰能捨爺

孃痛自責血淚想暗灑合浦珠復還非人蓋天也從今  
莫登樓不測在其下飄瓦幸獲全相賀等弄瓦此兒太  
蚤慧災難果來惹眉目故宛然諦觀愈嬌姘

人日立春羅揆東邀集四印齋是王佑遐侍御

故宅

以下辛亥

適從何來如有亡坐定追省嘗此堂癭公爲我道前輩  
諦視齋榜增悽傷京曹風味略似舊城南歎詠饒鋒鏑  
戊庚以來幾陵谷諸子何戀能徜徉春非我春人非人  
莫及國論相否臧九衢東風塞荆棘銅駝索靖徒慨慷  
潘若海屬題唐人寫金光明最勝王經大吉祥

天女品卷子

善根不隱沒地味常增長瞻部放光明有情屬吾黨

贈林琴南同年

文如至寶丹筆若生薑曰一篇每脫藁舉世皆俯首平生不屈節肝膽照杯酒紛紛野狐羣忽值師子吼京師奔競場暮夜孰云醜畏廬深可畏斧鉞書在口隱居名益重方使薄俗厚奈何推稗官毋乃褻此叟斂才偶作畫石谷輒抗手亦莫稱畫師掩名究無取

高子益五十生日

公年五十融過二北海嘗云我亦然同是投荒生還者乞歸差喜在公前

遠遊篤學時誰用漸達中年道未行莫與朝官論資格安心却病是平生

劉聚卿屬題翁覃谿書金剛經塔圖本

柳書精搨金剛經近出燉煌之石室唐人寫經此其最  
見之使人每自失聚卿示我初有悟結構艱辛掃圓滑  
書來復示經塔本細楷乃是覃谿筆一塔適成經一部  
共嗟此老太巧密名流好事殊可喜葉氏刊傳妙無匹  
陶齋收藏甲天下獨肯爲子捨珍物翩翩詩字含古味  
駸駸北斗欲度越邇來時事愈難挽志士灰心競學佛  
好持此經禮浮圖收拾精魂斂心骨迴文哀怨誰復諒  
蘇蕙英靈久埋沒題成卷圖起看天飛鴿喧空繞雙闕

贈周松孫

撫心有所恨不遇未爲冤嗟子有心人儻悲予所言  
景廟久不豫海內方憂煎徵醫滿天下彌留孰能延傷  
哉母忍子敝屣同棄捐懷忠竟莫獻坐視甯非天戊戌



有賤臣終身思舊恩燕都復握手躑躅聲俱吞子詩非  
世味中有梅翁酸今日幸把玩苟生堪一歡

趙堯生侍御屬題唐人寫金光明經

袖中有諫書不顧上怒喜直聲雖如雷貪墨殊未止史  
魚事無道伯玉恥君子心腸一木石面目安能改緣何  
獨佞佛正坐文字美結習不易除覺癢因有技以經名  
其室意特重唐楷誰能白世尊何以置此士欲識堅牢  
神現身只公是

孫師鄭求題祖庭遺蹟卷子

悲涼從軍行慘淡山水筆是家多名士累世見毛骨  
奇石不可見佛雲今有圖殷勤畏盧叟為作補天餘

桐城陳鏡潭求題其弟琴甫事略

陳侯肆於文爲弟作佳傳浮生謝溝壑至行出瞑眩鬼神使果有殀壽各無恨吾特憂其無有之復何患

題太平李君傳後

王梧岡  
鄉人

廠市相望競列肆金石圖書亦略備奇貨秘居射大利  
碧眼賈胡入猶憐李君魁桀有深智刻苦居積業必遂  
晉人堅守終不媚肯與燕人鬪狡獪風氣日漓誠可慨  
吾言有意誰能會

題慈仁寺訪松畫冊

南城往往見老樹託命精藍資掌故諸松毛骨想父祖  
吟嘯寺門誰與顧 福陵饗殿鬱蒼蒼手撫龍腰暗斷  
腸瀋陽歸客休看畫挂夢渾河片日黃

陶齋得漢雒陽木平方竹杖端因削箭筈製杖自

題以詩又使余賦之

破觚爲圓規，倂矩削圓成。方始陶父持危扶顛，誰杖汝落日天閭。久延伫坡頭，犖确復崎嶇。戴笠相逢，便下車自愛木家翻姓譜，還將海賦問元虛。

陶齋屬題旡悶園雅集圖

名園蕭疏帶林壑，勝事飛觴破寂寞。千秋尚友誰與歸，奎宿精靈如可作。陶齋心醉爲梁髯，圖就還將險韻拈閒殺。諸賢終凜凜，可能蝓志共厭厭。

送胡瘦篁侍御出京

逐流病未能行道，嗟有命踟躕不忍去。始見君子性讀君言別詩，烈意出淡定浩然，孰能止尹士惡知孟諸賢。抱餘惜累錢，苦未稱去留志。雖異微箕各爲正，繫予久。

自放情直行頗徑驅車偶過關心不善朝政挽之既甚  
難誰敢問究竟酒壚共取醉聊以助歸興剛腸儻猶熱  
未免顧破甑江湖不寂寞或者天可勝

羅拔東招集花之寺

花寺同來寺未花却疑題榜近浮夸京曹盡帶儒酸味  
詩社休參國論譁二月春深偏雨雪南城冰解屢迴車  
舉杯只合催人別自覺憂時意已奢

胡瘦篁時將出京

馬通伯屬題姚惜抱劉石庵行楷卷子

明人尚閣帖香光始一變國朝競學董闡然似鄉愿夢  
樓尤側媚醜作吳姬面姬傳稍勁秀董鬼終入腕後來  
有南園縱筆絕傲岸紛紛女郎耳此士真好漢

姚卷

安吳論書家欲下石如拜鄧書殊非雅惡札豈可耐石



庵號蘊藉堆墨作狡獪未若何道州斫陳不挂鎧何筆  
晚苦驕崑駢近俗態出林喻飛鳥我意在無礙

劉卷

二月二十二日集陶然亭

水光明滅入高寺戴雪西山耀天際推窗滿眼是江湖  
今日江亭最清麗江亭佳處在一曠十丈車塵隔人外  
下車登閣似登山步步層層帶吟思林梢草根動黃綠  
觀闕遙空隱丹翠清談何必遠流涕坐送斜陽足餘味  
小丘迤北特孤聳於此置樓有殊致若能張鏡吸山光  
卧看方知勝閒對我來數旬本閑客况值胡公懷去志  
諸賢儻念會合難莫惜看花數聯袂

題合肥張勇烈公樹珊畫像

勃然猶如生見此萬人敵善以少擊衆當者皆辟易平

吳方奮飛援楚俄折翼勇烈真嘉名千載想風格

三月三日林山腴招集南河泊

微陰三月三草生水初活相將趨水次天影與波濶春  
水似勝秋冰釋未匝月水邊雖無人春氣自發越畏廬  
商畫稿最取山一抹林間窄堵坡勢若湧木末嬉遊甘  
適野聊散衝冠髮肉食者謀之懷棟崩且折吾儕歸何  
黨曷不樂今日

張小帆中丞屬題文文忠山水小幅

文忠立朝端正人所依附國家有大計立斷無所顧平  
生惟樸直異域亦愛慕巍然咸同間賴此中流柱寥寥  
山水筆冲厚意何裕好將配文節

戴熙

藝事道已寓

張庵招集積水潭

弢庵被徵晚入朝海內相賀仰名德日下特開禮學館  
大事先援天下溺中古以降家天下三綱五常有誤釋  
紛紛聚訟見已小去聖萬里猶面壁叔孫自謂知世變  
兩生抱古吾益惑周監二代尚博採墨守一孔豈爲得  
諸儒讀書亦云廣所患淑世乏高識夷之墨者欲見孟  
道有不同孰能直先生用意酌宇宙軟語當使衆喙息  
却憐結習終未除長避路塵親水石西涯一角真冷地  
澤畔行吟暫閒適與遊不必盡朝士眷眷遂至夕陽匿  
袁絲籍福今俱老安能隨俗矜枉尺

潘弱盦招遊極樂寺余以事未至

春歸人去轉悽其

瘦望山映  
皆將去

詩社闌珊欲付誰如許汚

人塵十丈閉門花事不嫌遲

是日大風  
海棠未開

父兄持我來遊日三十年來夢未忘但詠弢庵詩足矣  
可堪重至國花堂

弢庵亦補作詩

題岳飛名印

印爲牙製白文岳飛之印

幼慕湯陰節日夜搜稗史壯過臨安墳憤慨看湖水詩  
詞實隱秀翰墨多可喜玩印幾摩挲哀公如象齒

四月二日曾剛父招集崇效寺

剛父今茶山詩法有所受五言最沈著意度一何厚讀  
之每歎息風味如中酒春歸詩社晚惘惘三月後驅車  
白紙坊賞此楸株醜丁香裁及簷詎出王朱手壁間摩  
唐石馬廐迫隘秋風流一消歇文字亦何有勞生過白  
駒危局化蒼狗且極一日樂今日可無負

陳士可屬賦李克用題字



沙陀獨眼兒初起勢頗悍赴難雖有功拒汴終不展局  
促居河東四戰豈長算契丹既背盟幽州復中變愛女  
不能保晉陽幾輸欵徒知相斫爾霸業去已遠譽兒真  
暮氣三矢殊可憫

趙堯生招集法源寺

相從追餘春別近願數見復此雙楮下談諧接諸彥與  
君知漸深片語輒稱善未來孰能料拭眼待千變吾謀  
適不用堅壁勿浪戰酒行言又發何異弦上箭

四月二十四日渡海

泱泱渤澥意如何騰碧翻金眼底過出世只應親日月  
浮生從此藐山河南歸不用懷吾土東去誰能挽逝波  
愛斂滔天露孤島棄船聊欲上嵯峨

七月十八夜捨飯寺

雷電向何處長空月皎然浮雲甯易世人意自彌天樹影深遮寺鐘聲苦破眠酣嬉不歸者真比獨居賢

七月二十九日詣白廟胡同寶宅壽伯第夫人出見

竹坡菊客慘相隨誰信諸孫骨亦灰登榻招魂如見欸  
戊戌來視伯第嘗坐此室共語入門掩涕更增哀不祥名節嗟爲祟一  
往清狂渺此才還向鬢孀想遺直可堪憑弔到孤鮐伯

妻父聯公元爲拳匪所害追諡文直

捨飯寺

燕市秋衣已化緇高樓何處問歸期西風斜日無人院  
乞與麤官作住持

題邵位西手書與戴醕士曾滌生梅伯言三詩

卷子

書生自言癡抑之愈鬱勃視賊如蟲鼠安能爲少屈半  
巖在京師慙直善面折曾梅各敬憚琦賽被攻訐世亂  
歸抱書抵死終不輟三詩好風味行楷尤可悅展卷暗  
傷嗟古道恐遂滅

曾士元求題其母節孝劉太夫人柏石畫冊

處世有百艱勝天惟一德移冬以作春視此石上柏節  
母行至高健順實殊特孤嫠振門戶貽訓資簡策諸孤  
得其孝母氣稟自昔交游盡英彥聲譽競推激韓蘇賦  
此畫取義各有適子瞻稱天命終始介如石退之羨平  
地技幹遂萬尺堅貞母以之蘇論誠不易吾當誦韓詩

餘慶徵所積

續海藏樓襍詩

黨人倡仇滿屠戮及婦孺享國誠有毒無辜彼何與淩  
弱而暴寡不義我所惡獨怪億萬心亦有億兆詛蒸民  
喪懿德孰可以理喻夷齊獨叩馬忤世良弗顧

其十三

天下奇男子惟有王保保平生惜此人豪傑盡推倒誰  
能厲忠義抗節誓不撓萬人苟一心羣孽豈難掃丈夫  
縱失敗善死固有道首鼠深可憎窟免詎爲狡

其三十六

君子尚不屈尺蠖時求伸欲伸而暫屈此義難喻人箕  
比行不同所同在其仁不仁辭必屈安能掩其真士窮  
見節義顛倒非所聞向來謬揚抑嚼舌吾何云

其三十七

官身有束縛僨事非吾謀長沙獲先去一士天所留東



華再閱月兵氣橫窮秋悲風捨飯寺獨嘯哀南州事急  
嗟無人堪爲朝廷羞澤生可共死惜我非其儔舉世輕  
忠義苟全爲高流誰能從重華甘與鹿豕遊

其三十八

全家陷兵間自意必離散登高望洞庭方寸亦已亂大  
江接烽火捲土紛驚竄兒垂得吾勇挺身赴危難飄魂  
不成夢惡耗叢萬箭丁甯若死別去去復何戀誰知能  
自拔相見猶疑幻冥冥或使之痛定從所願

舊武建軍部曲劉玉

堂盧明亮等遣二卒護送  
家口至上海其三十九

樓前菊始花樓上月又滿填胸無底哀花月空挂眼時  
事遽至斯終身意未展奔車與覆舟丘夷殆虛產行吟  
但袖手生世苦已晚殊無阮籍狂差似稽康嬾

其四

吾心有是非詩書爲之主中含古性情乖戾了無取世

風忽揚塵吹我墮何所舉頭失日月震耳劇雷雨營營  
魂不昧耿耿意自許欲呼平生親顧笑反予侮高樓外  
無地掩卷成獨語雲垂鬼神黑知己幸有汝其四十一  
之官而北上留京而南歸屈曲使投閒天歟非人爲功  
名與節義時論方背馳名教已掃地何人能維持指心  
許蒼天一老乃憊遺徐行萬馬中舍我噫其証其四十二

哀長沙縣知縣沈瀛

沈字士登江蘇人  
長沙陷罵賊遇害

吳兒輕靡盡隨風九鼎吾終重此公勢不兩存能自決  
人皆一死未爲窮交期太淺真相失節義何常或可同  
他日私成黃沈傳還從鬼錄想雙雄謂黃公忠浩

危樓

落木危樓對隕霜北風吹鴈自成行雲含海雨千重暗

秋盡籬花十日黃已坐虛名人欲殺真成遺老世應忘  
燒城赤舌從相逼未信河東解崇方

柳子厚有解崇賦

十月二十八日夜起

樓前夜色暗屯兵雨猛風饕正四更呵壁問天終不測  
枕戈待旦獨難平冠讎土芥成酬報猿鶴蟲沙孰重輕  
剩約毘陵子陸子陽狂被髮送餘生

陸焯土惡國人之不義欲被髮鬻之

以終老

十二月二十五日鑑泉示生日詩

是夜九點一刻北京下詔

遜位並命袁世凱籌設臨時政府

避兵真媮生亡國方忍死非徒無死所留眼將有視君  
王何所慕棄國如敝屣天傾地維絕舉世悖人理老夫  
今焉歸投彼虎與兕磨牙復吮血大亂從此始嗟君抱

忠義阿世深所恥傷心生日詩不啻以自誅歌哭老更  
哀意氣付逝水惟應奮史筆文獻徵宋杞惡名彼何成  
千秋誅豎子

聞 詔述哀二首

少負致君志蹉跎三十年恨深孝欽世氣盡 景皇前  
自竄長辭闕投荒遂戍邊拊膺終有欠晚節不成堅  
吾父潛郎署趨庭只教忠宦途偏不遂國史忽云終死  
所原難覓時流莫苟同未求人事盡可得咎天公

MAY 15 2001

EAST ASIAN STUDIES



海藏樓詩：

十三卷本并附  
前未刻詩及遺墨

撰者：鄭孝胥

發行者：鄭文

發行所：天風出版社

香港九龍上海街五百六十七號二樓  
電話：三〇四一八三一

經售處：港九各大書局

線裝本上下二冊

港幣：四十元





